ŞEYH GÂLİB HÜSN Ü AŞK

Hazırlayan Muhammet Nur DOĞAN



T. C. KÜLTÜR VE TURİZM BAKANLIĞI KÜTÜPHANELER VE YAYIMLAR GENEL MÜDÜRLÜĞÜ

3136

KÜLTÜR ESERLERİ

419

ISBN 978-975-17-3358-0

www.kulturturizm.gov.tr

e-posta: yayimlar@kulturturizm.gov.tr

Bu kitap internet ortamında ilk kez yayımlanmaktadır.

1 Hamd ana ki kıldı halka rahmet Tahmîdde acze verdi ruhsat

> Acz olmasa hâl olurdı müşkil Pây-i kec-i kilk olurdı der-gil

Ger hamdine yoksa hadd ü ihsâ Şükr et ki zebân-ı acz gûyâ

Hamd eyle ki verdi şer'-i ma'nâ Tahmîd-i Hudâ'da acze fetvâ

5 Bahş eyledi ehl-i acze idrâk Fehvâ-yı şerîf-i "mâ arefnâk"

> Âhir yine acz olurdı hâsıl Ammâ olamazdı kimse vâsıl

Noksânımıza himâyet etdi Ta'cîz degil inâyet etdi

Aslah ana vâcib olmamışdır İhsânını mûcib olmamışdır

Mahz-ı keremiyle etdi tasvîr Adl üzre nizâm-ı halkı takdîr

10 Acz olmasa bî-nevâ kalırdık Hep ebkem ü kec-edâ kalırdık

> Müşkildi edâ-yı şükr ü tahmîd Kanda leb-i zerre kanda hurşîd

Ammâ ki zebân-ı aczimiz var Vasfında beyân-ı aczimiz var

İnsâf ile ger olursa dikkat Ni'met mi degildir acze ruhsat

Her bir ni'amın senâsı lâzım Bu bahsde şükr olur mülâzım

15 Bundan dahi aczimiz hüveydâ Afvetdi yine Cenâb-ı Mevlâ Bî-had eger eylesek tahayyül Zencîr-i sühan bulur teselsül

Mevc urmağ ile muhît-i fikret Cûş eyledi hayret içre hayret

Min ba'd dil oldı mest ü medhûş Akl eyledi bahr-i nutkı hâmûş

Der Na't-i Nebevî ve Evsâf-ı Latîf-i Mustafavî Sallâ'llâhü Te'âlâ Aleyh

Ervâh ki tuhfe-i Hudâ'dır Hâk-i reh-i şâh-ı enbiyâdır

20 Ol şâh ki tahtı lâ-mekândır Cârûb-keşi kerrûbiyândır

> Ol şâh ki mâh çün sitâre Pâbûsına oldı pâre pâre

> Cibrîl nevâline haberci Mîkâil anın vekîl-i harcı

"Levlâk" ile zât-ı pâki mevsûf Kur'ân'a sıfâtı zarf u mazrûf

Dervâze-i tâkı *"kaabe kavseyn"* Ferş-i kademi ulûm-ı kevneyn

25 Şâh-ı melekût-ı arş-pâye Mâh-ı ceberût-ı ferş-sâye

> Birdir dedi âşnâ-yı vahdet Mevc-i ahadiyyet Ahmediyyet

> Çün *evvel-i mâ halakdır* ol nûr Sânî-i Hudâ desem de ma'zûr

Âdem ki cenâb-ı bü'l-beşerdir Bâğ-ı nebevîde bir şecerdir

Giryân olup oldı Nûh-ı nevvâh Deryâ-yı melâhatinde mellâh

30 Cûş-âver olunca nîl-i kabzı Mûsâ'ya Hızır yetişdi feyzi Şer'iyle edince tîğ-zenlik İbrâhîm'e düşdi büt-şikenlik

Mi'râc-ı kemâl-i zâtın İdrîs Sükkân-ı semâya kıldı tedrîs

Bir rütbe ki hüsn-i bî-bahâsı Yûsuf dahi abd-i müşterâsı

Tebşîr için kudûmın Îsâ Tâ minber-i çarha çıktı gûyâ

35 Îcâdı vücûd-ı kevne bâis Ümmetleri sırr-ı ilme vâris

> Âyîne-i vahdet-i ilâhî Mir'ât-ı vücûdıdır kemâhî

Îmân-ı hakîkîye ol âgâh Besdir sana bir Nebî bir Allâh

İrvâ-yı ıtâşı râyegândır İ'câzı müşârün bi'l-benândır

Müşgîn sevâd-ı şâm-ı *Esrâ* Menşûr-ı nübüvvetinde tuğrâ

40 Söz olsa da menba'-ı kerâmet Kur'ân'a nazîre olmaz elbet

Kur'ân o Resûl'i kıldı tavsîf Ahlâk-ı azîmin etdi ta'rîf

Ey hâme zebânın eyle kûtâh Levh üzre kalemle yazmış Allâh

Der Menkabet-i Mi'râc-ı Şerîf-i Nebevî ve Mu'cize-i Bâhire-i Mustafavî

Bir şeb ki sarây-ı Ümmühânî Olmuşdı o mâhın âsmânı

Ammâ ki ne şeb emîn-i rahmet Şeyhu'l-harem-i harîm-i hazret

45 Mânend-i Bilâl-i sâhib-irfân

Nûr-ı siyeh içre nûr-ı îmân

Gûyâ o şeb-i şeref-meâsir Veysü'l-Karen idi nûrı zâhir

Yüz sürmege geldi hâk-i pâya Da'vetli bulundılar alâya

Ol leyle için sipihr-i gerdân Etdi niçe bin sabâhı kurbân

Çün âb-ı hayât o şâm-ı enver Rengi siyeh idi mevci ahdar

50 Ebr-âver olup bahâr-ı nâsût Cûş eyledi sebze-zâr-ı lâhût

> Ser-çeşme-i Hızr olup hüveydâ Ervâh-ı bekâya oldı irvâ

Zulmât çekip surâdık-ı gayb Sır söyledi mâha mihr lâ-reyb

Tâ mihr ede mâha arz-ı dîdâr Zulmât-ı hafâya girdi envâr

Cûş eyledi sanki nîl-i hayret 54 İhyâ ola tâ ki mısr-ı vuslat

55 Bast eyledi nokta-i süveydâ Sırr oldı içinde şâm-ı *esrâ*

> Envâr ile kâinât doldı İşte o gece sabâh oldı

Şevk eyledi mihri pâre pâre Şenlendi meşâil-i sitâre

Bir hırmen-i nûr olup nüh eflâk Hurşîdi kapatdı pertev-i hâk

Bir feyz erişdi bu zemîne Kim oldı sarây-ı âb-gîne

60 Ger etmese mihr ü meh tekaddüm Şebnem yerine yağardı encüm

Envâr büridi kâinâtı Rûşen görür oldılar hayâtı Berk urdı o şeb-çerâğ-ı nâ-yâb Mahv oldı hep âftâb ü mehtâb

Bir hırmen idi nücûm-ı pür-tâb Hurşîd ü meh anda kirm-i şeb-tâb

Âyîne-i nûr olup şeb-i târ Yâr eyledi yâre arz-ı dîdâr

65 Gönderdi Hudâ edip meşiyyet Cibrîl-i emîni peyk-i da'vet

> Her geh ki inerdi âsmândan San arşa çıkardı hâk-dândan

Tebşîr kılıp sürûş-ı a'zem Dedi ki eyâ Resûl-i ekrem

Adın kodılar Burâk-ı yektâ Geldi ayağına arş-ı a'lâ

Eyle güzer arş u âsmânı Mahzûn buyurma lâ-mekânı

70 Ol maksad-ı *kün fe kân*-îcâd Fermân-ı Hudâ'ya oldı münkâd

> Her şey olur aslına şitâbân Çıkdı yine âsmâna Kur'ân

Çün bastı rikâba pây-i himmet Zîn hânesi idi beyt-i vahdet

Ne kaldı zemîn ü ne zemâne Mahvoldı bu turfa âşiyâne

Cûş eyledi çün muhît-i vahdet Ma'nâya mübeddel oldı sûret

75 Hem sûrete girdi sırr-ı vahdet Ma'nâ-yı kadîm buldı sûret

Någeh görünüp harîm-i aksâ Abdiyyetin oldı sırrı peydâ

Ol sâcid olup Hak oldı mescûd Dendi bu makâma gayb-ı meşhûd

Ervâh-ı rüsül cemâat oldı Allâh bilir ne hâlet oldı Ey hâme o rütbe olma çâlâk Esrâr-ı nübüvvet olmaz idrâk

80 Deryâ sözi şebneme ne lâyık Tanrı işi âdeme ne lâyık

> Gel âdet-i şâirâna git sen Sûfiyye sözin ferâgat et sen

> Çün bastı sipihr-i evvele pâ Oldı iki pâre bedr-i ra'nâ

Tâ halka ıyân ola mücerred Kim devr-i kamer mi devr-i Ahmed

Mi'râcda çün zamân yokdur Evvel demege tüvân yokdur

85 Mâh olması mu'ciziyle münşak İsbât idi şerh-i sadrı elhak

> Ol bî-dile iltiyâm kıldı Gönlini alıp hırâm kıldı

Çavuşluk etdiler sürûşân "Allâh ü ma'âk"le dem-hurûşân

Azmeyledi vahy-i vârid üzre Vardı felek-i Utârid üzre

Çün geldi o şâir-i felek-câh Ol şâhdan oldı ma'zeret-hâh

90 Afveyledi nâme-i siyâhın Hassân'e bağışladı günâhın

> Meb'ûsına rehber oldı bâis Açıldı der-i sipihr-i sâlis

Zehrâsın edip şefî' Zühre Afvından o şâhın aldı behre

Çârüm felegi kılınca seyrân Fahr etdi dü bâre çâr erkân

Feyz aldı mülâhdan Mesîhâ Tekrârdan oldı sanki ihyâ

95 Berk urdı o şeb-çerâğ-ı câvid

Şermiyle zemîne girdi hurşîd

Çün târem-i hâmis oldı menzil Mirrîh'e erişdi hadşe-i dil

Kan ağlayıp etdi özre âheng Dâmân-ı sipihri kıldı gül-reng

Afvetdi o şâh-ı âsmân-rahş Azrâil'e kıldı cürmini bahş

Çün şeş cihet oldı kâm-hâhı Çarh-ı şeşüme erişdi râhı

100 Tâ ede o şâh-ı heft-iklîm Kâdî-i sipihre şer'i ta'lîm

> Teblîğ kılıp Cenâb-ı Hak'dan Nehy eyledi hükm-i mâ-sebakdan

Men' oldı kehânet ile tencîm Zâhirle müzâhir oldı tanzîm

Çün erdi sipihr-i heftümîne Bahş etdi saâdet âlemîne

Keyvân şefî' edip Bilâl'i Böyle deyip etdi rûy-mâlî

105 Besdir bana bu şeb özr-hâhî Bâlâ-ter-i reng kıl siyâhı

Çün hazret-i pâdşâh-ı *"levlâk"* Tekmîl ile kıldı seyr-i eflâk

Amma dahi bahşîş-i ilâhî Mi'râcını bulmadı kemâhî

Kürsîye basınca pây-i reftâr Şevk eyledi sâbitâtı seyyâr

Teşrîfi için buyurdı zîrâ Olmuş felekü'l-burûc ber-câ

110 Basmağla kadem vücûd-ı pâki Eflâke çıkardı Sevr-i hâk'i

> Lûtf edip o pâdşâh-ı yektâ Koz bekçi başısı oldı Cevzâ

Deryûze elin açınca Mîzân Dirhem yerine dür etdi rîzân

Hût eyledi zîr-i hâke âheng Girdâb-ı hafâya girdi Harçeng

Kıldı Esed ibn-i ammini yâd Tahlîsine andan oldı imdâd

115 Zîrâ Hamel eyleyip şikâyet Etmişdi celâdetin hikâyet

> Delv ağlayıp oldı hâli derhem Bir reşha deyip be-çâh-ı Zemzem

Bir feyz ile şâd olup ögündi Dûlâb-ı Muhammedîye döndi

Pervîn ile Cedy olınca tezyîn Sıbteynine tuhfe kıldı ta'yîn

Şehperr-i sürûş ol şeb-i râz Hep Sünbüle'den ederdi pervâz

120 Çün sâat-ı çarha lâzım Akrep Vaktâ o da kıldı arz-ı matlap

> Buldı şeref-i kabûle imkân Fevt olmadı bir dakîka ihsân

Kavsine bakınca Zâl-i dehrin Pek za'fını gördi hâl-i dehrin

Ol şâhsüvâr-ı *"kaabe kavseyn"* Kıldı seferin verâ-yı kevneyn

Cibrîl-i emîne oldı hem-pâ Tâ arş-ı Hudâyı kıldı me'vâ

125 Levh ü kalem ü hezâr esrâr Hem oldı kerrûbiyân be-dîdâr

> Şevkından o rütbe oldı medhûş Arş eyledi sâhibin ferâmûş

Arşı bırakıp misâl-i sâye Zü'l-arş dedi o arş-pâye

Ol seyrde mâverâ göründi Tâ Sidre-i müntehâ göründi Açıldı der-i harîm-i vuslat 131 Kurbet girü kaldı geldi vahdet

130 Cibrîl'de acz olup hüveydâ Elfâzı bırakdı anda ma'nâ

> Evvel ne idi ne oldı bilmem Leb-rîz idi ol ne doldı bilmem

> Ey rahmeti râygân Rahmân Lûtfinla bu benden eyle şâdân

Hâhiş-ger-i devlet-i müebbed Ya'nî ki fakîr Gâlib Es'ad

Mücrîmdir egerçi ümmetindir Ümmîdi senin şefâatindir

135 Olmazsa şefâatinden ihsân Çok zâhidin ola hâli hirmân

> Çün ehl-i kebâirim siyeh-kâr Her maksadıma beşâretim var

Der Vasf-ı Şerîf-i Cenâb-ı Hudâvendigâr Kuddise Sirruhu

Hatm etdi çü enbiyâyı Allâh Geldi bize evliyâ-yı âgâh

Şehdir o gürûha Molla Hünkâr Besdir bu cihâna bir cihân-dâr

Sultân-ı serîr-i mülk-i irfân Seccâde-nişîn-i şîr-i Yezdân

140 Endîşesi reh-nümâ-yı tahkîk Mânendesidir vekîl-i Sıddîk

> Hurşîd-i sipihr-i sulb-i Hayder Zer silsile reh-rev-i Gazanfer

Ney-pâre-i kilki kıldı meşhûd Bildik neyimiş nevâ-yı Dâvûd

Oldı ulemâ-yı dîne fâyık Peygamber-i Rûm denilse lâyık Ma'nâ-yı kelâmı rûh-bahşâ Mehdî gibi şer'i eyler ihyâ

145 İsm olmadı bir kitâba el-ân Seyr et şerefin ki mağz-ı Kur'ân

> Mülk-i sühanı sevâd-ı a'zem Bir buk'ası taht-ı İbni Edhem

İbrâhîm-i Gülşenî gibi merd Olmuşdur o bâğa bülbül-i ferd

Abdâl-ı felek helâk-i aşkı Mihr ü mehi sîne-çâk-i aşkı

Ebyât-ı şerîfî âyet âyet Esrâr-ı şerîat ü hakîkat

150 Rûşen sühanı çerâğ-ı ma'nâ Her noktası şeb-çerâğ-ı ma'nâ

> Ser-tâcı gürûh-ı evliyânın Şâh u çelebîsi asfiyânın

Etmişdir ihâta garb u şarkı Emvâc-ı muhît-i gark u farkı

Aktâr-ı cihâna hükmi cârî Eczâ-yı zamâna feyzi sârî

Âlem dolu feyz-i himmetinden Bahs etme abes kerâmetinden

Der Zikr-i Pîşvâ-yı Hod

155 Bulmağa hitâm bu mebâhis Bir zât-ı sütûde oldı bâis

> Üftâde-i râh-ı ser-bülendî Ya'nî pederim Reşîd Efendi

Dil zâviyesinde münzevîdir Ser-bâz-ı muhibb-i Mevlevîdir

Hakdır bu ki deng ü lâl idim ben Nutk etmege bî-mecâl idim ben Kalmışdı zebân-ı hâme hâmûş Kılmışdı hezâr mevc-i gam cûş

160 Gelmişdi kelâl güft ü gûdan Geşmişdi hayâl reng ü bûdan

> Nâ-güfte kalıp makâl-i mi'râc Kalmışdı bu *Hüsn ü Aşk* bî-tâc

Söyle deyip etdi nutka ikdâm Feyz-i nefesiyle oldı itmâm

Bu güm-rehin oldı dest-gîri Ögretdi sühanda tarz-ı Pîr'i

Doldurdı benim o merd-i meydân Himmetle derûnum âb-ı hayvân

165 Çün oldı cihân-ı aşka rehber Olmaz mı übüvveti mükerrer

> Her nesne ki söylerim senâdan Âsûdedir âfet-i riyâdan

Ney gibi beni o zât-ı vâlâ Feyz-i nefesiyle kıldı gûyâ

Hem oldı sebeb hem etdi himmet Kıldım niçe ehl-i hâle hizmet

Âsâr-ı keremleriyle hakkâ İnkârı küfürdür oldum ihyâ

170 Anlar da demez buna inâyet Hem ben dahi eylemem kanâat

> Bahr-ı keremin verâsı yokdur Ol bahrda dürr-i feyz çokdur

İnşâallahü'r-Rahîm ü Rahmân Esrâr-ı şühûd olur nümâyân

Der Beyân-ı Sebeb-i Te'lîf

Bir meclis-i ünse mahrem oldum

Ol cennet içinde Âdem oldum

Meclis velî gülşen-i mahabbet Bülbülleri yek-ser ehl-i ülfet

175 Her birisi şâir-i sühan-senc Gencîneler elde cümlesi genc

> Ülfetleri şi'r ü fazl u irfân Sohbetleri nazm u nesr ü elhân

Ben mest-i sabûh-ı nükte-dânî Vakt ise sabâh-ı nev-cüvânî

Gâhî okunurdı *Hayrâbâd* Nâbî olunurdı hayr ile yâd

Hakkâ ki acîb bir eserdir Erbâbı yanında mu'teberdir

180 Hengâm-ı heremde söylemişdir Pîr oldığı demde söylemişdir

> Ol nazmın edip bir ehl-i ma'nâ Medhinde mübâlağayla ıtrâ

Bezm ehli serâser etdi ikrâr Bu kavli muvâfakatla tekrâr

Bir gâyete erdi kim meâli Tanzîrinin olmaz ihtimâli

Ol rıtl bana girân göründi Bir sûret-i imtihân göründi

185 Ta'rîzâne edip hitâbı Verdim o gürûha bu cevâbı

> Kim Nâbî'ye hiç düşer mi evfak Şeyhin sözine kelâm katmak

Ey kıssadan olmayan haberdâr Nâkıs mı bırakdı Şeyh Attâr

İşte o kadardır ol hikâyet Bâkîsi dürûg-ı bî-nihâyet

Manzûme-i Fârisî-veş ebyât Bi'lcümle tetâbû-ı izâfât 190 İnşâya verir egerçi ziynet Türkî söz içinde ayn-ı siklet

> Az olsa eger degildi mâni' Derdik ana belki de sanâyi'

Hem bir dahi var ki ol sühan-sâz İğrâkda mürg-i pest-pervâz

Evsâf-ı Burâk-ı Fahr-ı âlem Rahşiyye-i Nef'î andan akdem

Lâzım mı Burâk'ı medh ü tavsîf Bu kârı ana kim etdi teklîf

195 Afv eyleyelim ki belki bilmez Bir sürçen atın başı kesilmez

> Hem bir de bu kim o pîr-i fânî Almış niçe dürlü nâm ü şânı

Beş dâne şehenşeh-i melek-zâd Tab'ına keremle etmiş imdâd

Bâzâr-ı cihânda kâmın almış Meydân-ı sühanda nâmın almış

Böyleyken edip yine tekâsül Kılmış niçe ma'nîden tegâfül

200 Bulmağla bir iki hoşca ta'bîr Erlik midir izdiyâcı tasvîr

> Dersen ki Nizâmî-i girâmî Etmiş o dahi bu iltizâmı

Ol tarz-ı Acem'dir olmaz i'câb Rindân-ı Acem gözetmez âdâb

Her tavrına iktidâ ne lâzım Câizse de ictirâ ne lâzım

Hem bir dahi bu kim ol sühan-senc Vermiş kalemine renc-i bî-genc

205 Bir düzd-i bürehne-pâyı gûyâ Mansûr'a diler ki ede hem-pâ

Mi'râc-ı hayâle eyleyip sâz

İster ki Mesîh'e olsun enbâz

Mebnâ-yı binâ-yı *Hayrâbâd* Bir hayırsızın kemâlin îrâd

El-hak çalıp alma kıssadır ol Hırsızlara hayli hissedir ol

Pîrâne tekellüf etmiş el-hak Vermiş hele kâr-ı düzde revnak

210 Nush etse eger budur mezâkı Dünya fânî âhiret bâkî

> Olsa ne kadar harâb ü mağşûş Yokdur bunı bir işitmemiş gûş

Merd ana denir ki aça nev râh Erbâb-ı vukûfi ede âgâh

Olmaya sözi bedîhî-i tâm Ede niçe tecrübeyle itmâm

Ammâ kime eyleyim bunı fâş Ben dahi bileydim ol kadar kâş

215 Efvâha sözüm olaydı dem-sâz Lâzım mı idi felekde pervâz

> Veh veh bu ne şekve etdim izhâr Sad tevbe vü sad hezâr inkâr

Bir ehl-i sühan ki ede tahsîn Bin çarh deger o beyt-i rengîn

Dâim bunı der ki elde hâme Âfet bana i'tibâr-ı amme

Çün kârı himâyet eylemekdir İfhâma riâyet eylemekdir

220 Elbetde olup füsürde-hâtır Ma'nâdan olur zebânı kâsır

> Lâkin yine bellidir tabîat Meydandadır aldığın vedîat

Çâlâk-zamîr ü merd-i âgâh Etmez hele düzdi hem-ser-i şâh Olsa ne kadar şikeste-pervâz Uymaz yine kûf u kaza şehbâz

Kalmadı mı neş'e-i mahabbet Pâyâna mı erdi ol hikâyet

225 Hiç aşkdan özge şey revâ mı Sarf etmege gevher-i kelâmı

> Dersen ki hezâr olundı tekrâr Sahbâ-yi bekâdan olma bîzâr

> Âlem heme derd-i aşk u ülfet Bâkî keder ü elem nuhûset

Bu râhdan oldun ise âgâh Çıkmaz yolun üzre düzd-i güm-râh

Bu derd-i sühandır olmaz izhâr Ta'bîr edemem dahi neler yar

230 Gencûr-ı cevâhir-i sanâyi' Ol san'atı yok ki zevke râci'

> Hattâ dedi bir Mesîh-i hoş-dem Hem söyleyemem de hem begenmem

Etdim niçe dürlü i'tirâzât Hem her birisin de etdim isbât

Bu nağmeye kim ben etdim âheng Evvel beni kıldı zâr u dil-teng

Dutdı beni ol söz ile yârân Da'vâya gerek gel imdi bürhân

235 Nâbî ana kim güç ile ermiş Allâh sana gençliginde vermiş

> Aldım o hevesle kilki deste Bu nazmı dedim şikeste-beste

Noksânıma vardır i'tirâfım Bîhûde degil velîk lâfım

Bed-reng ise de kumâş-ı Evren Kalmaz yine kâle-i Halebden

Ân kes ki zi şehr-i âşinâyîst Dâned ki metâ'-ı mâ kocâyîst

Âğâz-ı Dâstân-ı Benî Mahabbet

240 Dil-zinde-i feyz-i Şems-i Tebrîz Ney-pâre-i hâme-i şeker-rîz

> Bu resme koyup beyân-ı aşkı Söyler bana dâstân-ı aşkı

Kim vardı Arabda bir kabîle Müstecmi'-i haslet-i cemîle

Ser-levha-i defter-i fütüvvet Ser-hayl-i Arab Benî Mahabbet

Ammâ ne kabîle kıble-i derd Bi'lcümle siyâh-baht u rû-zerd

245 Giydikleri âfitâb-ı temmûz İçdikleri şu'le-i cihân-sûz

> Vâdîleri rîk ü şîşe-i gam Kumlar sağışınca hüzn ü mâtem

Har-gehleri dûd-ı âh-ı hirmân Sohbetleri ney gibi hep efgân

Her birisi bir nigâra urgun Şemşîr gibi dehânı pür-hûn

Erzâkları belâ-yı nâgâh Âteş yağar üstlerine her gâh

250 Ekdikleri dâne-i şirâre Biçdikleri kalb-i pâre pâre

> Anlar ki kelâma cân verirler Mecnûn o kabîledendi derler

Her kim ki belâya mürtekibdir Elbet o ocağa müntesibdir

Satdıkları hep metâ'-ı cândır Aldıkları sûziş-i nihândır Sıfat-ı Bezm-i Îşân

Kasd eylese bunlar ayş ü nûşa Tûfân-ı belâ gelirdi cûşa

255 Sâgarları gürz-i kûh-peyker Sahbâları merg-i dehşet-âver

> Meclisleri rezm-gâh-ı âşûb Mutrıpları hây u hûy-ı dil-kûb

Pinyâli piyâle zann-ederler Pergâleyi kâle zann-ederler

Azrâil o kavme sâkî-i hâs Mirrîh bezimlerinde rakkâs

Kânûn u nakâre savt-ı şîven Teb-lerze-i cân-güdâz def-zen

260 İşret arasında nukl ü bâdâm Çeşm-i bed-i halk u zehr-i âlâm

> Mînâdaki penbe penbe-i dâğ Dâğ içre şerâb-ı şu'le ırmağ

Feryâd u şikence ye's ü hasret Esbâb-ı safâ dahi ne hâcet

Sıfat-ı Şikâr-ı Îşân

Azm eyleseler şikâra bunlar Gitmez gelecek diyâra bunlar

Tîhûları sûsmâr olur hep Dürrâcları perende akrep

265 Şehbâzları nigâh-ı hasret Dutdukları cuğd u bûm-ı dehşet

> Pertâb ile halkalansa ejder Hoş geldi sâf-ı küleng derler

Âhûları dûd-ı âh-ı ser-keş Endâmı siyâh şâhı âteş Sayyâdları şikâra urgun Tavşan o gürûha telli kurşun

İster okı gitmeye yabâna Kendi çekinir zih-i kemâna

270 Urdukları ef'î-i münakkaş Ok yılanı tîr ü rûy tîr-keş

Sıfat-ı Bahâr-ı Îşân

Ol semte gelince nev-bahârân Sahrâya olurdılar girîzân

Peyvend edip âh-ı dâğı dâğa Çün berk giderler idi bâğa

Maksûdları hemân akar su Yeksân leb-i şerha vü leb-i cû

Şebbûyı görür kimi sanır şeb Kimisi de sünbüle der akrep

275 Dâğ-ı gamı gül-feşân sanırlar Kan ırmağın ergavan sanırlar

> Her biri gezer kenâr-ı bâğı Devşirdigi lâle kendi dâğı

Bilmez biri zevk-ı bûstânı Almış anı derd-i dil-sitânı

Bilmez ki nedir nihâl-i gül-nâr Âteş mi bitirdi yoksa gülzâr

Gül mi güler ergavân mı ağlar Etfâl-i nihâl kan mı ağlar

280 Bülbülde mi gülde mi bu efgân Sünbül mi olan acep perîşân

> Cû-bâra niçin uruldı zencîr Durmaz yine kimden oldı dil-gîr

Kimdir düşüren hevâya servi Almaz kanad altına tezervi Derdi ne ki nergis oldı bîmâr Bakmaz mı yüzine yoksa dildâr

Âteş mi yağar hevâ yüzinden Gül mi biter iştikâ yüzinden

285 Bilmez biri hâk ü âsmânı Seçmez gözi necm ü gülsitânı

> Mecnûn gibi her yeri gezerler Ammâ katı serserî gezerler

Her faslı bahârına kıyâs et Söyletme hazânların hirâs et

Vâkıa-i Garîhe

Bu tâifenin içinde bir şeb Bir hâl göründi gâyet agreb

Birbirine girdiler felekler Ağlar kimisi güler melekler

290 Bir velvele sakf-ı âsmânda Bir zelzele sath-ı hâk-dânda

> Bin şevk u tarab hezâr korku Nâkûs u nakâre bang-i *yâ hû*

Geh zulmet olurdı tûy-ber-tûy Geh nûr yağardı sûy-ber-sûy

Hep secdeye vardı berg ü eşcâr Hayretle eridi akdı enhâr

Geh zâhir olup hezâr tehdîd Geh mevc ururdı bîm ü ümmîd

295 Encüm arasında iktirânât Bârân-ı ferah tegerg-i âfât

> Zulmetle mahûf çok sadâlar Âvâz-ı bülend-i âşnâlar

Güm güm öter âsmân sadâdan Güm-geşte zemîn bu mâcerâdan Herkesde bu ızdırâb sârî Dil-şâdlık emr-i i'tibârî

Dehşetle dolup hevâ vü ecrâm Doğdı o şeb içre bin serencâm

Vilâdet-i Hüsn ü Aşk

300 Oldı bu sarâya pâ-nihâde Ol gice iki kibâr-zâde

> Fi'l-hâl açıldı subh-ı ümmîd Hem mâh doğdı vü hem de hurşîd

Ol hâle sebeb bu iki şehmiş Her biri süvâr-ı mihr ü mehmiş

Ammâ biri duhter-i semen-ber Biri püser-i Mesîh-manzar

Fehm etdi kabîle mâcerâyı Hep duydı bu iki mübtelâyı

305 Hüsn eylediler o duhtere ad Ferzend-i güzîne Aşk-ı nâ-şâd

Hüsn'e dedi sonra kimi Leylâ Şîrîn dedi kimi kimi Azrâ

Mecnûn kodi kimi Aşk için ad Vâmık dedi kimi kimi Ferhâd

Sonra o lügat olup dîger-gûn Leylâ dedi Aşk'a Hüsn'e Mecnûn

Her ân bozup kazâ tılısmı Bir gûne degiştirirdi ismi

310 Bunlar dahi tıfl-ı bî-serencâm Gerdûn dolaşır ki ede güm-nâm

> Güm-nâmlık ile bula şöhret Güm-geştelik ola sonra âdet

Nâm-zed Şüden-i Hüsn Bâ Aşk

Bir bezm-i latîf edip mürettep Sâdât-ı kabîle geldiler hep

Re'y eylediler ki bu iki mâh Birbirinin ola hâh nâ-hâh

İrzâ edeler babalarını Böyle edeler duâlarını

315 Bu re'yi olup kazâ müessis Bî-gâile hatm olundı meclis

Âsûden-i Aşk Der Mehd

Bed' eyledi Aşk pîç ü tâba Bend oldı kımât-ı ızdırâba

Yapdırdı sipihr-i pür-felâket Tâbûtdan ana mehd-i râhat

318 Tâ dîdesi ola hâba mu'tâd Bu şi'ri ederdi dâye inşâd

Tardiyye

Ι

Ey mâh uyu uyu ki bu şeb Gûşunda yer ede bang-i yâ Rab Ma'lûm degil egerçi matlab Öyle görünür ki hükm-i kevkeb Sîh-i siteme kebâb olursun

II

Ey gonca uyu bu az zamândır Çarhın sana maksadı yamandır Zîrâ katı tünd ü bî-amândır Lûtf etmesi de velî gümândır Havfım bu ki pek harâb olursun

III

Ey nergis-i aşk hâb-ı nâz et Dâmân-ı kazâya düş niyâz et Bin havf ile çeşm-i cânı bâz et Encâm-ı belâdan ihtirâz et Bâzîçe-i inkılâb olursun

IV

Gel mehd-i safâda râhat eyle Birkaç gececik ferâgat eyle Fikr eyle sonun inâyet eyle Süt yerine kana âdet eyle Peymâne-keş-i itâb olursun

V

Mehd içre uyu ki ey semen-ber Kalmaz bu revişde çarh-ı çenber Bir hâl ile gerdiş etmez ahter Seyr et sana az vakitde n'eyler Seyl-i gama âsyâb olursun

VI

Bîdârlık ile etme mu'tâd Uyhudan olur olursa imdâd Bir zehr sunup bu çarh-ı cellâd Gâlib gibi kârın ola feryâd Bezm-i eleme rebâb olursun

Tetimme-i Kelâm

Mehd içre o âfet-i semen-ber Mâh-ı nev içinde mihr-i enver

320 Cünbîde olunca mehdi her ân Sîm-âb gibi olurdı lerzân Lerzişde idi o necm-i ümmîd Âyîne içinde sanki hurşîd

Çâh içre misâl-i mâh-ı Nahşeb Ya mihre yer oldı burc-ı Akreb

Gehvârede çün olurdı dil-gîr Ditrerdi gılâf içinde şemşîr

Mehd içre uyurdı çün o âfet Cism içre bulurdı rûh kuvvet

325 Nûr-ı nigeh idi san o âhû Olmuşdı makâmı künc-i ebrû

> Îsâ idi ya o tıfl gûyâ Mihrâb idi ana mehd-i ulyâ

Ammâ yine gamdan idi bîzâr Râhat döşeginde sanki bîmâr

Bir hâl ile eylemezdi ârâm Ditrerdi misâl-i şu'le endâm

Gâhîce ki pek harâb olurdı Derlerdi ki mest-i hâb olurdı

330 Velhâsıl o âteş-i gül-endâm Bu cünbüş ile geçirdi eyyâm

Âsûde Şüden-i Hüsn Der Mehd

Olurdı kazâ-yı nâ-besâmân Hüsn'e dahi gâhvâre-cünbân

Kıldı anı da sipihr-i bî-dâd Bir cünbüş-i vâj-gûne mu'tâd

Mahzûnluk içre zevk-i şâdî Dil-şâdlık içre nâ-murâdî

Sûretde çok ihtirâm ederdi Hâbı gözine harâm ederdi

335 Çün fîtne idi o şûh-ı gaddâr İsterdi kazâ ki ede bî-dâr Tafsîlden edelim ferâgat Tâ olmaya mûcib-i melâlet

Şâyeste degil ki ola yârân Evvel nazarında deng ü hayrân

Zuhûr-ı Mukaddimât

Çün geçdi bu hâl ile meh ü sâl Vakt oldı ki etmeye gam ihmâl

Sâdât-ı kabîle oldılar cem' Bu re'y-i rezîne yakdılar şem'

340 Kim ola bu iki şûh-ı âkil Tahsîl-i hünerle bedr-i kâmil

> Sermâye-i ârzû hünerdir Baş egme kişiye tâc-ı serdir

Çün kıldı kamerle âşnâyî Herkes işidir bilir Sühâ'yı

Sebak-daş Şüden-i Îşân Der Mekteb-i Edeb

Bir kışra girip dü mağz-ı bâdâm Bir mektebe vardılar Edeb-nâm

Bir beyt olup iki tıfl-ı mısra' Ma'nâ-yı latîfe oldı matla'

345 Efsûn okur iki çeşm-i câdû Pîş-i nigehinde rahle ebrû

> Hâme gibi dü-zebân ü yek-dil Bir bahsi olurlar idi nâkil

Yek nûr olup iki şem'-i kâfûr Kıldı orasın sarây-ı billûr

Mekteb olup arada heyûlâ Bir sûrete girdi iki ma'nâ Bir şâhda iki gonca-i gül Birbirlerine olurdı bülbül

350 Biribirine ulaşdı bunlar Ol bâğçede kan yalaşdı bunlar

> Âyîne ederler idi gâhî İrsâl-i meselde mihr ü mâhı

Bir yerde olup ikisi câlis Âyîneye girdi aks ü âkis

Mekteb o harem-sarây-ı vahdet 354 Cem' oldılar anda hecr ü vuslat

Biribirine çeşm-dâr-ı hirmân Firdevs içinde hûr u gılmân

355 Olsun meh ü mihr-i çarh me'nûs Pervâne vü şu'le cevv-i fânûs

> Mâbeynde târ u pûd-1 vuslat 356 Hayrân hayrân nigâh-1 dikkat

Hep dersleri rızâ vü teslîm Mollâ-yı Cünûn pîr-i ta'lîm

Der Vasf-ı Mollâ-yı Cünûn

Ammâ ne Cünûn şeyh-i kâmil Müftî-i müdebbirân-ı âkil

Tenhâ-rev-i vâdî-i muhâlât Vâreste-i kayd-ı ihtimâlât

360 Cehlin gecesin sabâh kılmış Menhîleri hep mübâh kılmış

> Çıkmaz ne umûrı şâh-ı fikre Düşmez yolı seng-lâh-ı fikre

Ef'âli *çirâ* vü *çûn*dan dûr Hem dînde hem küfürde ma'zûr

Yanında şeh ü gedâ müsâvî Aklın sözi türreh ü mesâvî Yek başına pâdşâh-ı kâdir Hükmince gider bütün meşâir

365 Yokdı ser ü kârı zann ü şekde Hîç şübhesi kalmamış felekde

> Allâh'a bile olursa ser-keş Havf eylemez anı yakmaz âteş

Başlı başına bir özge sultân Askerleri var serâser üryân

Var hüccetine göre usûli Çesbîde kıyâsına füsûli

Bahs etse eder cihânı ilzâm Bir sözle eder fihâmı ifhâm

370 İbni Melek'i koyup zemîne Bin neng bulurdı Fahridîn'e

> Seyr edip imâmesin İmâd'ın Şalgam Hoca takmış idi adın

Bezminde kopuzcu Mîrzâ Cân Bir curcuna harcı Fahr-i Cürcân

İhsânına kör dilenci İblîs Kaşmer başısı Aristetâlis

İklîm-i belâda şeyhülislâm Kavline terettüp etmez ahkâm

Âşık Şüden-i Hüsn Bâ Aşk

375 Ber-hükm-i kazâ-yı nâ-muvâfık Hüsn oldı cemâl-i Aşk'a âşık

> Bin cân ile Hüsn-i âlem-ârâ Çün oldı o Yûsuf'a Züleyhâ

Ma'şûk olacakken oldı âşık Azrâ olacakken oldı Vâmık

Etdi ruh-ı Hüsn'i nesteren-zâr

Ruhsâre-i Aşk u aşk-ı ruhsâr

Elf okısa kaddin eyleyip yâd Tâ arşa çıkardı âh ü feryâd

380 *Cîm* okısa zülfe eyleyip dâl Bir noktadan anlar idi bin hâl

> Hançer gibi *râ*dan idi bîmi Saklardı lebinde harf-i *mîm*i

Dendâne-i *sîn*-i erre-sîmâ Eylerdi nihâl-i ömrin ifnâ

Sîpâresi elde bedr-i tâbân Mânend-i kelef hatı perîşân

Etfâl eder idi derse dikkat Bunlar biribirine meveddet

Der Çigûnegî-i Ez Mahabbet-i Îşân

385 Var eyle o gülşeni tahayyül Pervânesi gül çerâğı bülbül

> Hûn-germ idi Aşk'a lâ'l-i nûşîn Ferhâd'ına cân verirdi Şîrîn

Tûtî görünürdi ol şeker-leb Ma'şûk idi âşıkâne-meşreb

Leylî'si hayâl-i Kays'a Mecnûn Pervâneye sem'i zâr u dil-hûn

Geh kâkülini dökerdi dildâr Gül bûseye dâğ açardı ruhsâr

390 Geh lâ'li açıp o gûne sohbet Berg-i gül olurdı çâk-i humret

> İsmet komaz olmağa dehen-bâz Peydâ idi lîk gevher-i râz

Hüsn'ün sözi ülfet ü mahabbet Aşk'ın işi hayret içre hayret

Sûretde cenâb-ı Aşk hâmûş Girdâb gibi muhît eder nûş Sevmez mi sever mi kimse bilmez Ol rütbe de bî-haber denilmez

395 Hâmûş ne âh eder ne efgân Medhûş ne yol bilir ne erkân

> Âyîne gibi hemân ol âfet Bî-cân ü zebân bir özge sûret

Bakdıkça alır cenâb-ı Hüsn'i Cezb eyler o âftâb-ı hüsni

Hurşîd gibi o mâh-ı Nahşeb Yekpâre nazar ne gûş u ne leb

Âteş gibi Hüsn olur fürûzân Allâh bilir kim ola sûzân

400 Eşki gibi Hüsn olurdı bî-tâb Her âh başına tavk-ı girdâb

> Mînâ gibi Aşk'a ser-fürûda Bu şîşede sanki ol sebûda

Dil-hûn idügi bu âşkâre Zâhirde ol ise seng-pâre

Hüsn'ün talebi verâ-yı imkân Aşk'ın garez-i zamîri pinhân

Âhû gibi hoş-hırâm u bed-hû Hîç kimseye eylemez tekâpû

405 Hüsn olmada ol füsûn-kâre Mânende-i dâm pâre pâre

> Gâhîce ki Aşk göz süzerdi Hayretle bu şûh cân üzerdi

Dest-i nigehinde tîğ-i dikkât Endîşeye dâğ açardı hayret

Derdi ki aceb bu çarh-ı âşûb Ben hâkini eylemez mi matlûb

Besbelli ki gayri yâr gözler Âyâ ne şekil şikâr gözler

410 Bedr ise murâdı ben şeb olsam

Gerdûnı severse kevkeb olsam

Kangı büt için eder tahayyül Zünnâr olamaz mı bana kâkül

Olsam o büti görüp Berehmen Mahbûbına hizmet eylesem ben

Gâhî de tefekkür edip ol mâh Derdi ne bu söz neûzü billâh

Hîç var mı felekde böyle kevkeb Kim mihr ede mâha arz-ı matlab

415 Ben mâha ki etmeye o rağbet Eyler mi Sühâ'ya sarf-ı dikkat

> Lâkin yine Hüsn-i âlem-ârâ Etmezdi bu mâcerâyı ifşâ

Ketm eyler idi bu güft ü gûyı İncitmez idi o mâh-rûyı

İsmi belî Hüsn-i bî-behâne Ammâ ne idi o bî-bahâ ne

Der Vasf-ı Hüsn

Bir lâle-ruh-ı siyâh-kâkül Sünbüller içinde gonca-i gül

420 Âyîne-i sîne bahr-ı sîm-âb Ikd-i güher olmuş anda girdâb

> Dendân u dehânı idi lâ-rayb Pür dürr ü güher hazîne-i gayb

İ'câz da ol dehâna maksûr Bir nokta vü şerh-i âyet-i nûr

Leb-teşne-i hayrete zenahdân Peymâne-i sîm-i âb-ı hayvân

Hayret-dih-i cân o çeşm-i şehbâz Âhû-yı füsûn kebûter-i nâz 425 Bâzû-yı latîfi şâh-ı sîmîn Gûyâ ki hamîri berg-i nesrîn

> Engüşt-i sefîdi şem'-i kâfûr Gül-berg-i hınâsı gonca-i nûr

Bâlâ-yı bülendi mahşer-îcâd Kaddiyle belâ-yı âsmân şâd

Cünbişleri fitne-i kıyâmet Gîsûsı o fitneye alâmet

Leb-teşne-i harfî lâ'l ü incû Yâkût-ı lebi velî sühan-gû

430 Zülfe çekip ebruvânı şemşîr İki tarafa bölündi zençîr

> Bîmâr nigâhı düşmen-i cân Gîsû-yı siyâhı hasm-ı îmân

Pür-nûr u beyâz o sîne-i sâf Benzerdi amûd-ı subha bî-lâf

Gerden leb-i cûda serv-i sîm-âb Gûyâ ki Bogaziçi'nde mehtâb

Envâr-ı sabâh-veş binâ-gûş Hurşîd ana şeb-çerâğ mengûş

435 Zih-gîr-i mücevher ile ol dest Ser-pençe-i mihri kıldı işkest

> Ruhsârı sabâh-ı îd-i ümmîd Gülgûnesi hûn-ı çeşm-i hurşîd

Bâzûları kevser-i muhalled Engüşteri cevher-i mücerred

Pervîn-i felek ve sâir ahter Gerdânına beste ıkd-i gevher

Gîsûları genc-i anber-i hâm Hâl-i ruhı ana Hindû-yı bâm

440 Pistânı turunc-ı bâğ-ı cennet Çeşmi o turunca mest-i hayret

> Kâ'bın edip ol perî muhannâ Düşdi ayağa ayağ-ı sahbâ

Lâ'l-i lebi gevher-i şeker-rîz Şem'-i ruhı mâhtâb-ı gül-bîz

Ebrûları hîre-sâz-ı efhâm Müjgânları nîze-bâz-ı evhâm

Reng-i ruhı penbe içre yâkût Ma'nâyı dehânı harf-i meskût

445 Rûh-ı lebi cevher-i tekellüm Gül ruhları cennet-i tebessüm

> Şemşîr-be-kef o çeşm-i sâhir Gencîne-i mülk-i nâza nâzır

Künc-i deheninde hâli gûyâ Bir Mağribîdir ki genc-cûya

Ol sîne-i sâf o gerden-i nûr Âyîneye karşu şem'-i kâfûr

Ruhsârına sâye salsa müjgân Başdan ayağa olurdı lerzân

450 Bu beyt ile san Nizâmî-i pîr Müjgân ile zülfin etdi ta'bîr

> Zülfeş reh-i bûse-hâh mîrüft Müjgâneş Hudâ dehâd mîgûft

Lâ'l-i lebi şu'le-i şeker-nûş Gül ruhları nevbahâr-ı gül-pûş

Gencîne-i sîne genc-i neyreng Âyîne içinde nakş-ı Erjeng

Şîrîn lebi hemçü gonça-i nûr Pervânesi hem-safîr-i zenbûr

455 Tîr-i nigehi şihâb-ı sâkib Sehm-i sitemi kazâ-yı sâib

> Sîr-âb-ı hayâli feyz-i mülhem Bîtâb-ı makâli sırr-ı mübhem

Gül-gûn kabâsı hûn-ı tâvûs Nâzında hezâr reng mahsûs

Bîzâr-ı cefâsı mülk-i Efgân

Gülzâr-ı edâsı şekkeristân

Çîn-i sitemi belâ-yı ümmîd Mihr-i keremi safâ-yı câvid

460 Çeşminden ereydi Hızr'a dermân Zulmet görünürdi âb-ı hayvân

> Eyler dile zülfi va'd-i peyvend Tefrîke eder nigâhı sevgend

Olmuşdı o turra-i perîşân Tuğra-keş-i katl-i derd-mendân

Alıp şeh-i mülk-i nâzdan bâc İklîm-i niyâzı kıldı târâc

Müşg kâfilesin urup o gîsû Her târına dizdi kurs u tenzû

465 Kâkülleri âfet-i dil ü dîn Fermânına beste Çîn ü Mâçîn

> Çeşmân-ı siyehle nakş-i ebrû Mihrâbın içinde çifte "*yâ Hû*"

Hâl-i siyehi belâ-yı sâmân Şûriş-dih-i Zengibâr u Sûdân

Âhû-reme-veş hezâr Leylî Mecnûn-ı hayâlinin tufeyli

Zülfinde hezâr rişte-i cân Peyveste-i târ u pûd-ı nisyân

470 Gül rûyına niçe cân-ı âgâh Gülbang-keşân-ı "bâreka'llâh"

> Yekpâre nezâket ü letâfet Hemvâre melâhat ü sabâhet

Ey hâme hezâr bâreka'llâh Oldun cezebât-ı Hüsn'e âgâh

Yâd eyledin ol mehin senâsın Vasf eyleyerek temâm edâsın

Çün nazm ile maksadın eserdir Aşk'ı dahi söylemek hünerdir

Der Vasf-ı Aşk

475 Bir mâh-ruh-ı siyâh-çerde Çün âb-ı bekâ verâ-yı perde

> Hat cevher-i sebz-i âb-ı şemşîr Mehtâb-ı siyeh-bahâr-ı Keşmîr

> Gülzâr-ı gamında Hızr-ı ma'nâ Zehr-âbe-hôr-ı hayât-ı dünyâ

Mağrûr nigâhına ne kâbil Cibrîl ola mürg-i nîm-bismil

Azrâil-i gamze âfet-i cân Fitne ana çeşmi bağlı kurbân

480 Hatt-ı ruhı dûd-ı nâr-ı Nemrûd Lâ'l-i lebi kevser-i mey-âlûd

> Ser-cümle helâk olurdı âfâk Hatt-olmasa mâr-ı zülfe tiryâk

Çeşminde nühüfte nutk-ı Îsâ Bir sözle kazâyı eyler ihyâ

Ser-mest nigâhı tîğ-i bürrân Sahbâsı sirişk-i çeşm-i hûrân

Zîr-i külehinde târ-ı perçem Mâh içre nüvişte ism-i a'zem

485 Elde kılıç âftâb-ı hûn-bâr Eyler şühedâyı gark-ı envâr

> Zülfi ki eder füsûnı âgâh Gamze okur "*el iyâzü billâh*"

Eyler nigehi ederse bî-dâd Îsâ'yı arûs-ı merge dâmâd

Hat gerd-i lebinde nûr-ı tenzîl Îsâ gibi nâzil olmuş İncîl

Cellâd-ı nigâhın et temâşâ Azrâil'i gör ki rûh-bahşâ 490 Bir haste bu kim neûzü billâh Azrâil öninde *el amân*-hâh

> Bir leb k'ede harf-i mihrin îrâd Kan içme şafak-veş ana mu'tâd

Müjgânı ki nîm cünbiş eyler Bin cünd-i belâ nümâyiş eyler

Rûh-ı sühanı ki cân-fezâdır Uşşâkına aslı yok belâdır

Envâr-ı cemâli olmaz idrâk Hurşîd yanında bir avuç hâk

495 Ma'nâ-yı dehânı sırr-ı lâhût Her va'di serâb-gâh-ı nâsût

> Bir rütbededir tecellî-i nâz Olmaz "erînî" ye gûşı hem-râz

Âşıkları hasm-ı dîd-i vâdîd Müjgânları pençe-bâz-ı hurşîd

Ol bî-gama hûn-ı çeşm-i Ya'kûb Gül-gûne-i nev-arûs-ı matlûb

Hem-nâle-i ney heves-gerânı Bezminde terâne "len terânî"

500 Fitrâkine beste mürg-i îmân Zünnâr güsiste rişte-i cân

> Hatt-ı lebi hûn-ı akla fetvâ Kurbân-ı nigâhı cân-ı takvâ

Nutkı leb-i tîğ-ı nâza üstâd İncâzı da va'di gibi bî-dâd

Şemşîri behişt-i hûna tâvûs Şeş-perri künişt-i dîne nâkûs

Şeb-dîz-i sipihre mihri Hüsrev Zin hânesi hâne-i meh-i nev

505 Bî-dilleri va'di gibi berbâd Mânend-i habâb süst-bünyâd

> Bu beyt ile Neş'et-i sühan-sâz İcmâl-i cemâlin etdi i'câz

Şem'-i ruhına sipihr fânûs Pervâne melek velîk me'yûs

Yekpâre bu çarh olaydı hurşîd Kaşına hilâl ederdi taklîd

Benzerdi cemâl ü hattına ger Zulmetde doğaydı mihr-i enver

510 Bedr içre olaydı Zühre dem-sâz Hâl-i ruhına olurdı enbâz

> Nûr-ı siyeh olsa pâre pâre Etmem ben o zülfe istiâre

Nûş eylese âb-ı Hızr'ı Îsâ Hatt-ı leb-i Aşk başka ma'nâ

Ger Yûsuf olaydı haml-i Meryem Olurdı cemâl-i Aşk'a tev'em

Zî-rûh olaydı gonca-i nûr Nûş-ı lebine olurdı zenbûr

515 Bir sûrete girse küfr ü îmân Ol hattı ederler idi bürhân

> Feyz alsa Mesîh'den Hülâgû Olurdı o gamzeye du'â-gû

Ruhsâresine hat-ı muanber Firdevs-i berîn içinde kâfer

Yok yok o izâr-ı pâke kâkül Hırmen-geh-i âteş içre sünbül

Ol sâhir-i gamze bî-muhâbâ Cibrîl çi vü kudâm Îsâ

520 Etmez gamı ârzû-yı bî-dâd Yohsa n'olacak bu heft bünyâd

> Vermez nigehine izn-i yağmâ Çokdan yıkılırdı dîn ü dünyâ

Tûfân-ı gama çü niyyet eyler Etfâl-i sirişke rahmet eyler

Nûh-ı gamı olsa "lâ tezer"-hân

Fir'avnı ederdi gark-ı îmân

Hârût-ı nigâhı etse îmâ Üftâde-i çâh olur Züleyhâ

525 Küfr olsa harâb-ı dîne me'mûr Çeşm-i siyehi verirdi destûr

> Bir dilde ki yaktı şem'-i matlûb Pervânedir anda kirm-i Eyyûb

Bâzâr-ı mahabbetinde Yûsuf Âlûde-be-hûn-ı sad teessüf

Deryûze-gerân eder serâpâ Cem mührini zîb-i dest-i beyzâ

Ruhsâresi âftâb-ı tâbân Âteşler içinde mihr-i rahşân

Hitâb-ı Sâkî

530 Sâkî kerem eyle bî-dimâğım Pâ-beste-i rişte-i ferâğım

> Mey ver ki bu derd çâresizdir Deryâ-yı sühan kenâresizdir

Bî-cûş kala mı bu kulzüm-ı sâf Ben söylemeyim sen eyle insâf

Mey nûrını çün dirîğ edersin Mâh-ı dili zîr-i mîğ edersin

Vehm et dil-i pâre-pâremizden Dîbânı sakın şirâremizden

535 Başımdaki kulzüm-ı hevesdir Sözden ne çıkar ki bir nefesdir

> Sâkî meded et ki müst-mendim Bâzâr-ı belâda gam-pesendim

Lâzım bana niçe nakd-i güftâr Tâ cins-i gama olam hırîdâr Güftâr velîk mestlikden Üftâdelik ü şikestelikden

Mey ver ki sühan hitâma erdi Sermâye-i gam tamâma erdi

540 Müşkil bu henûz olurken âğâz Dîbâçe-i râz kaldı nâ-sâz

> Mey ver bana ey gül-i letâfet Hem sor ki ne eylerim hikâyet

Âmeden-i Hüsn Gâh Gâh Be Halvet-gâh-ı Aşk

Sâkî-i şerâb-ı bezm-i ma'nâ Bu neş'eden oldı rûh-bahşâ

Kim Hüsn edip iştiyâkı efzûn Günden güne meh-veş oldı dil-hûn

Derd-i dilin etdi Aşk müzdâd Bin fikr ü hayâle oldı mu'tâd

545 Artırdı cemâlin ızdırâbı Nev'-i dîger oldı âb ü tâbı

> Endâmına lerze verdi bu tâb Âyîne idi velîk sîm-âb

> Câm-ı mül-i şu'leye kanardı Ruhsârı parıl parıl yanardı

Gül-gûnesi hûn-ı eşk-i hirmân Esfîdi beyâz-ı çeşm-i giryân

Bahtı kara zülf-i pür-hamından Hâbı dağınıkdı perçeminden

550 Geh zülfini ferş-i râh ederdi Geh hem-çü sabâ gelir giderdi

> Ârâm u sükûn kârı düş-vâr Âvârelik ihtiyârı düşvâr

Bir gûne kurardı lu'bet ü bâz Şatranc-ı gama bulurdı açmaz Nâhîd gibi olup şeb-âheng Kalmazdı sabâha nağme-i çeng

Her şeb reh-i ömrini dürerdi Halvet-geh-i Aşk'a yüz sürerdi

555 Her gece misâl-i kirm-i şeb-tâb Bâğ-ı emele olurdı reh-yâb

> Uyhuda görince çeşm-i yârı Pervâneden ögrenirdi zârı

Ya'nî ki o bülbül-i hôş-elhân Hâmûş hâmûş ederdi efgân

Bir rütbe ederdi nerm-reftâr Olmazdı halîde pâyine hâr

Çün kevkeb-i sâbite giderdi Gûyâ ki felekle seyr ederdi

560 Gamdan nefes almayıp o bî-cân Mânend-i habâb olurdı lerzân

> Huffâş-veş ol hümâ-yı devlet Şeb-revligi eylemişdi âdet

Zulmetde gezerdi bî-muhâbâ Ma'nâ idi harf içinde gûyâ

Mehtâba olurdı sâye-güster Tâ olmaya nûrı bâr-ı dilber

Etmez idi ayağ üzre reftâr Sâyem düşe yâri ede bîdâr

565 Mehtâba olunca sâye-pîrâ Eyler idi ebr-i âhı bâlâ

> Bahtın dahi istemezdi bî-dâr Şâyed vere hâb-ı yâre âzâr

> Bî-sît ü sadâ gelir giderdi Gûyâ ki gönülde seyr ederdi

Tayy-eyler idi dil-i figârı Âyîne içinde Zengibâr'ı

Bir âh ile kaldırıp rikâbın Zulmetde görürdi âftâbın 570 Maksad bu ki ede seyr-i dîdâr Âgâh-ı nigâhı olmaya yâr

> Bîdâr bulunca dil-nüvâzın Açmazdı sahîfe-i niyâzın

Sûz-ı gam ile edip müvâsâ Handân görünürdi şu'le-âsâ

Şîrîn şîrîn deyip fesâne Şekker hâba eyleyip behâne

İsterdi ki yâri ede der-hâb Söylerdi meselde kâh-ı sincâb

575 Zülfiyle edip sirişki pinhân Cûy u çemeni olurdı gûyân

> Irlardı cünûn terânesinden Leylî Mecnûn hikâyesinden

Âhir uyudukda ol semen-rû Ol bâğa ederdi çeşmin âhû

Mecnûn-veş olurdı ol hıred-mend Bir sâde nezâre ile hursend

Var bunda bir âşikâre ma'nâ Kim Hüsn idi Aşk'a âşık ammâ

580 Seyrine gece ederdi rağbet Etmişdi niyâza nâzı sebkat

Der Vasf-ı Bahâr

Rıdvân-ı behişt-i âferîniş İnsânü'l-ayn-ı ehl-i bînîş

Ya'nî kalem-i siyâh-câme Bu tarz ile bed' eder kelâma

Bir dem ki bahâr-ı âlem-efrûz Bahş etdi cihâna câm-ı nevrûz

Ol mülden olup zamâne ser-mest Neyreng-i tılısmın etdi işkest 585 Dünyâ dolu neş'e-i tarabdan Mahşer yeri nakş-i bü'l-acebden

> Cennet gibi sebze cûş-ber-cûş Eyler gül ü lâle nûş-der-nûş

Her kûçede bir sabâh-ı fîrûz Her goncada bir kabâ-yı nevrûz

Bilmem ne şerâb içirdi hurşîd Etfâl-i çemen hep oldı Cemşîd

Bârân yerine yağıp mey-i nâb Döndi çemenin başına girdâb

590 Âhû gibi ebr-i nev-demîde Beslendi hevâ-yı sünbülîde

> Bir rütbe hevâ rutûbet-efzâ Kim oldı nesîm seyle hem-pâ

Feyz aldı sifâlden karanfül Bûy-i gül ile sulandı sünbül

Cûş eyledi çeşme-i zümürred Aks eyledi târem-i zeberced

Berk etdi o gûne bir şeker-hand Kim mâh eder oldı ana sevgend

595 Medd-eyledi cûy-i şîri mehtâb Çalkandı gümüş suyıyla sîm-âb

> İnsânı rutûbet etdi mahmûr Oldı müje şehd-i hâbâ zenbûr

> Bir feyz verip hevâ-yı gül-bîz Bâğ etdi şerengi gül-şeker-rîz

Bir neş'e verip bahâr-ı pür-şûr Kıldı reg-i ebri târ-ı tanbûr

Çün kıldı hevâ rutûbetin sâz Göstermedi mürg-ı şu'le pervâz

600 Pür-nem bu hevâ-yı abharîde Reng-i gül olur mı hîç perîde

Gösterdi hevâ çü sîne-i bâz

Kimdir vere mürg-ı hâba pervâz

Sahbâ-yı cünûn alıp dimâğın Bağlandı ayağı cûya bâğın

Nevrûz edicek hevâyı nem-nâk Tûtî peri oldı sebze-i hâk

Nesr-i felek indi âşiyâna Gül-gonca hümâya oldı lâne

605 Tâ nâmiye öyle buldı kuvvet Ervâh çeker nihâle hasret

> Her tâk ki mehd-i tâka yatdı Pistân-ı sehâba el uzatdı

> Her dür ki sehâbdan döküldi Etfâl-i çemen sevindi güldi

Ebr eyledi bâğı tûşe-gencûr Şekkerde uçardı tûtî zenbûr

Müşg idi nesîmi bûstânın Dinmezdi rüâfi ergavânın

610 Zencîr-i cünûn edip teselsül Cû-bâra karışdı mevce-i gül

> Cûş etdi o rütbe seyl-i nîsân Seng ü hazef oldı dürr-i galtân

Micmer gibi göz göz oldı dünyâ Her çeşme gülâb-dân-ı zîbâ

Çarh etdi dimâğını muattâr Berk eyledi atsâyı mükerrer

Bir neşv ü nemâ düşüp zemîne Tâ erdi sipihr-i çârümîne

615 Her tûde-i hâk olup Bedahşân Lâ'l ırmağı oldı bâğa cûşân

> Ol feyz ile oldı hâre vü seng Hem-şa'şa'a-i harîr-i gül-reng

Her gonca ki çıkdı gül-sitândan Râz açdı zemîn ü âsmândan Şâh-ı güle döndi şâh-ı âhû Müşg nâfesi verdi serv-i dül-cû

Cennet haberin getirdi gülzâr Tûbâya nazîre hâr-ı dîvâr

620 İsrâfil olup nesîm-i zîbâ Bu haşr-i zemîni kıldı ihyâ

> Bülbül gibi geldi şevk-i bâli Açdı güle gonca kîl ü kâli

Sûsen boyanırdı yâsemenden Kan damlar idi ruh-ı semenden

Gizli öpüşüp gül ü karanfül Nergislere el salardı sünbül

Gülşende fisilti oldı peydâ Etdiler anı nesîme ifşâ

625 Hercâyî benefşe eyleyip cûş Hem hâme hem oldı nâme hâmûş

> Nergis söz açıp şerâb ü neyden Dür saçdı peyâm-ı tâc-ı Key'den

Kaldırdı elin çenâr-ı ser-keş Bir söz dedi var içinde âteş

Yakdı o haberle lâle dâğı Âşüftelenip gülün çerâğı

Doldı yer ü gök figân ü zâre Olmadı o sohbet âşikâre

Bîrûn Reften-i Her Yek Berây-ı Temâşâ-yı Nüzhet-gâh-ı Ma'nâ

630 Te'sîr-i hevâdan Aşk-ı zî-şân Olmuşdı uyûn-ı şevkı cûşân

> Hüsn'e dahi geldi başka hâlet İkisi de kıldı kasd-ı nüzhet

Kıldı o iki çerâğ-ı rûşen Nüzhet-geh-i Ma'nî'yi neşîmen

Der Vasf-ı Ân Nüzhet-gâh

Nüzhet-geh-i Ma'nî öyle bir yer Kim âbı benefşe hâki anber

Ol bâğ-ı behişt o hâk-i hurrem Hâk idi velîk hâk-i Âdem

635 Sidre'ydi nihâl o bâğa yek-ser Bir hâm erik anda çarh-ı ahder

> Ser-sebz giyâhı ömr-i câvîd Şebnemleri necm ü gonca hurşîd

Bir kulzüm-i nûr-ı sürh gülzâr Lû'lû-yı hôş-âbı lâ'l-i şeh-vâr

Her tûdesi Tûr-ı sad-tecellî Yok anda kelâm-ı "len terânî"

Rahşende çerâğı nûr-ı tenzîl Ferş-i çemen anda bâl-i Cibrîl

640 Şebbûları şeb-çerâğ-ı îmân Gül-berg-i hazânı cevher-i cân

> Zerrînleri bahr ü kâna kıymet Nergisleri yâdgâr-ı cennet

Hurşîd dıraht-ı nûr-ı esbâh Yapmış ana lâne mürg-ı ervâh

Şeh-perr-i sürûş berg-i eşcâr Mânend-i gül-i inâr gülnâr

Ol gül-çemene ne dûn ta'bîr Üşkûfeli sebz şâl-i Keşmîr

645 Mirrîh idi pâsbân-ı bûstân Ay çiçeği anda bedr-i tâbân

> Mercân u akîk genc-der-genc Eşcâr ü simâr sîb ü nârenc

Ahterle döşenme sahn-ı hâmûn Elmas çakıl taşından efzûn Her rîze-i huşk-i seng-pâre Yârâna delîl olan sitâre

Hizmetde o gülşene demâdem Îsâgülidir buhûr-ı Meryem

650 Nev-hat niçe dil-firîbe me'vâ Hercâyî benefşe deşt ü sahrâ

> Hem-hâlet-i gülşen-i tahayyül Gül-goncalar al kanadlı bülbül

> Hızr-ı çemeni yem-i zümürred Tarh arada zevrâk-ı zeberced

Mânend-i dıraht-ı piste çok hûb Müjgânını kılmış anda cârûb

Kandîl-i gül olıcak fürûzân Sahbâ idi revgan-ı dırahşân

655 Zülfin dağıtınca bîd-i Mecnûn Leylî'ye düşerdi kayd-ı hâmûn

> Serv etdigi demde arz-ı kâmet Pâyine düşer gelip kıyâmet

Sermest-i cünûn şakîk-i nu'mân Müstehzî-i sâgar-ı dırahşân

Nev-reste nihâl-i ergavânî Bâr-âver-i âteș-i cevânî

Çevgânı mücevher eyleyip tâk Serheng idi anda rûy-ber-hâk

660 Engûr-ı siyâhı Hindû-yı bâm Ammâ yeri çâr tâk-ı ecrâm

> Şeftâlû-yı gül-beyâzı ma'lûm Dilber yanağı demekle mevsûm

Emrûd ki âb-dâr u hoşdur Destiyle o bâğa âb-keşdir

Ser-sebz-i safâ dıraht-ı âlû Her meyvesi tûtî-i şeker-gû

Kaysîleri reng-i lâl-ı Leylâ

Mecnûn-ı hayâli câm-ı sahbâ

665 Her vişnesi gûş-vâr-ı yâkût Nezzâre-i çeşm-i âşıka kût

> Her sebzesi nevbahâr-ı Keşmîr Bî-sayf ü şitâ çü levh-i tasvîr

Bî-hadd ü kıyâs çeşm-i câdû Olmuş o benefşe-zâra âhû

Âlû-yı siyâhı âb-ı hayvân Ya gevher-i bî-nazîr-i Seylân

Sünbül ruh-ı nesterende kâkül Eyler ana şânelik karanfül

670 Ol bâğda lâleler serâser Bûstânî-i hâs sürh-efser

> Şehbâzı değil şikâra me'nûs Sayd eyler idi tezervi tâvûs

Hüdhüdleri serde Cem gibi tâc Perrî çerîsiydi kebk ü dürrâc

Tefsîde-dilân fişeng-i mehtâb Rûşen-güherân çü kirm-i şeb-tâb

Olmuşdı o bâğ-ı şu'le hâmûn Müstağnî-i mihr ü mâh-ı gerdûn

Der Havz-ı Feyz

675 Bir havz-ı mübârek ol makâmı Sîr-âb eder idi Feyz nâmı

> Etmiş meger ol riyâzı Mevlâ Yekpâre gümüş suyı-yla irvâ

Mir'ât-ı cemâl-i şâhed-i gayb Ol havz-ı celî idi bilâ-rayb

Pinhân idi gûne gûne hâlât Deryâ-yı sıfât u gevher-i zât

Her bir sadefi defîne-i nûr

Çün pîle-i çeşm-i rûşen-i hûr

680 Âyîne-i sîm-i havza her dem Tasvîr olunurdı başka âlem

> Ol havza felek garîk ü mebhût Mihr ü mehi hem-çü Yûnus ü hût

Deryûze ederdi görse suyın Tesnîm dökerdi âb-ı rûyın

Varmış o suya şerâb-ı bî-gaşş Kim reşk ile olmuş ayn-ı âteş

Hızr âbı basıp o cây-ı pâki Sebz eylemiş ol şerîf hâki

685 El-kıssa o gülşen-i ferah-nâk Mânende-i tab'-ı şâir-i pâk

> Der Menkabet-i Sühan Ki Hân-sâlâr-ı Nüzhet-gâh-ı Ma'nâst

Bir pîr-i cüvân-zamîr ü ayyâr Olmuşdı o yerde mihmân-dâr

Nâmı Sühan ü azîz zâtı Mesbûk idi çarhdan hayâtı

Mâhiyyet-i hüsn ü aşka ârif Hâsiyyet-i germ ü serde vâkıf

Endîşesi şeb-çerâğ-ı irfân Sırdaş-ı zamîr-i cân u cânân

690 Hem mes'ele hem kitâb-ı münzel Hem mu'cize hem nebiyy-i mürsel

> İdlâl ü hüdâda misli nâdir Her vech ile kabz u basta kâdir

Kasd-eylese bî-silâh u cevşen Eyler idi sulh ü cenge reh-zen

Eylerdi edince lûtf ü ihsân Merg ile hayâtı cân u cânân

Geh dîv olurdı gâh perrî Geh bahrî olurdı gâh berrî 695 Güm-rehlere Hızr-ı râh olurdı Bî-keslere pâdşâh olurdı

> Geh âlim olurdı gâh şâir Geh zâhid olurdı geh sâhir

Fermânına ye's ü şevk mahkûm Ümmîd ü recâ yanında mazlûm

Emri-yle olur revân demâdem Geh eşk-i sürûr ü gâh mâtem

Mesrûr ederdi sûg-vârı Mahmûr ederdi hûşyârı

700 Evsâf-ı zekâsı söylenilmez Ma'nâları var ki kimse bilmez

> Muhtâc ana cümle halk-ı âlem Anınla bulur hayâtı âdem

Rûşen-ger-i hüsn-i mâh-rûyân Hâkister-i çeşm-i kâm-cûyân

Dil-şâdlara enîs-i hôş-dem Bîmârlara libâs-ı mâtem

Efkâra göre verir tesellî Mir'âta göre eder tecellî

705 Kasd eyleyicek eder ne minnet Bir anda zıddı zıdda illet

> Gâh olmuş esîr-i çâh-ı mihnet Gâh olmuş azîz-i mısr-ı devlet

> Şân-ı Sühan'a bu pâye dûndur Evsâfi dürûğdan füzûndur

Mebâhis-i Dîger

Ey tâlib-i şeb-çerâğ-ı ma'nâ İnsâf ile kıl kelâmım ısgâ

Bu ma'nîde bir iki mebâhis Tatvîl-i kelâma oldı bâis 710 Âkıl kılığında ba'zı mecnûn Yokdur diye düşdi tâze mazmûn

> Gûyâ ki sühan-verân-ı pîşîn Hep söyleyeler zamân-ı pîşîn

Hîç kimsede kalmayıp liyâkat Şâirlerin ola kârı sirkat

Bu gerçi degil cevâba lâyık Sarf-ı güher-i hitâba lâyık

Ammâ ki biraz da yâve-sencân Pes-mânde-i kavm-i cân bin cân

715 Zu'mınca sühan-ver-i zemâne Seccâde-nişîn-i kahvehâne

> Tiryâkî-i herze-hâb-ı menhûs Âteşler içinde hemçü kaknûs

Birbirlerine edip tekâpû Derler ki efendi böyledir bu

Var mı hele söylenilmedik söz Kalmış mı meger denilmedik söz

Şimdi kanı ol sühan-ver-i Rûm Nermî Odabaşı pîr-i merhûm

720 Ya Mihnetî-i belâ-keşîde Aynî Çelebi o nûr-ı dîde

> Eş'ârı alıp götürdiler hayf Kaldık hele biz bakiyyetü's-seyf

Kıymetlerimiz bilinsin ahbâb Erbâb-ı tabîat oldı nâ-yâb

Birbirine satmak için eş'âr Mazmûn-ı nevi ederler inkâr

Mecmûacık elde hokka belde Dükkân u sokakda her mahalde

725 Başın salarak taaccübâne Der ki koca Sâbit-i yegâne Kendilere olmamağla makdûr İster ede subh-ı nazmı deycûr

Zümre-i Âhar

Dîger müteşâirân-ı küttâb Kim ekseri hâcegân-ı küttâb

Kerrâke-i sûf-pür-mübâhât Mevc-âver-i bahr-i ıstılâhât

İndinde muazzam-ı metâlib Ezberlene *Münşeât-ı Râğıb*

730 Sonra bir iki güzelce oğlan Tanbûr ü şerâb ba'zı dîvân

> İş görmede tab'a gelse nefret Bunlarla imiş medâr-ı kuvvet

Muğlim deme bu demek degil mi Şâirligi bî-nemek degil mi

Olmaz hele sühtevât şâir Etmem o gurûhı bahse dâir

Telhîs şevâhidiyle mollâ Da'vâ ede nazmı zûr da'vâ

735 Şehrîlerimizde ba'zı yârân Semt-i hünere olur şitâbân

> Tahsîli Işık Torânîdendir Nakli işidir Revânîdendir

Mânend-i meges biraz erâcîf İster ede şehd-i nazmı tezyîf

Ya'nî ki kelâm-ı tâze-mazmûn Nâ-yâb ola hemçü tab'-ı mevzûn

Bahs-i Evvel Der Vücûd-ı Sühan

Ey hurde-şinâs-ı ma'nî-i pâk

Gûş et ki ne der bu kilk-i çâlâk

740 Hâricde olursa farz u ihsâ Tev'em gibidir mezâhir esmâ

> İhyâ ve imâteden mukaddem Muhyî-ydi yine Hudâ-yı ekrem

Ammâ ki biri birine lâhık Mahlûk ile halk nâm-ı Hâlık

Esmâ heme dem edip tebeddül Devr-i felege gelir tahavvül

Zıddiyyeti sanma zâtdandır Âsâr bütün sıfâtdandır

745 Hâşâ abes ola nazm u tağyîr Var her sıfat-ı Hudâ'da te'sîr

> Bî-naks u fenâ kadîmdir Hak Bî-lahn u sadâ kelîmdir Hak

Makdûra ki muktedir gerekdir Söylenmege söyletir gerekdir

Feyyâz-ı sühan Cenâb-ı Hak'dır İnsan bu atâya müstahakdır

Bildinse Kelîm-i lâ-yezâli Terk eyle dalâl-i i'tizâli

750 Evsâf-ı Hudâ'ya gâyet olmaz Feyz-i sühana nihâyet olmaz

> Tedkîk-i nazarla eyle insâf Ol feyzi tüketdiler mi eslâf

Bî-gâye vü bî-kıyâs ü tahmîn Söylenmede nev-be-nev mezâmîn

Sen kudret-i fehmi eyle peydâ Ben söyleyeyim sen eyle ısgâ

Ez-cümle teceddüd-i havâdis Mazmûn-ı neve degil mi bâis

Bahs-ı Sânî Der Lüzûm-ı Sühan

755 Dutmuşdı zamân-ı câhiliyyet Âlemleri da'vî-i fesâhet

> Bâzâr-ı Ukâz olurdı tanzîm Eş'ârın ederdi halk takdîm

Tîğ ile zebân ederdi da'vâ Hem-pâ idi irticâle gavgâ

Vaktâ ki Hudâ-yı Hayy ü zî-şân Kur'ân'ı cihâna kıldı ihsân

İ'câz ile cem' olup fesâhet Verdi füsahâ-yı kavme dehşet

760 Âciz kala tâ o kavm-i güm-râh Teklîf-i nazîre etdi Allâh

> El-ân yine kâim ü be-câdır İ'câz-ı kelâm-ı Hayy ü Kâdir

Ger kalmasa şimdi fark u temyîz Bî-fâidedir o emr-i ta'cîz

Ger şi'r ü fesâhet olsa nâ-yâb Kur'ân'ın olur bu fazlı güm-yâb

Ger kalmasa şâir-i sühan-dân Bürhân-ı Hudâ bulurdı noksân

765 Ta'cîz için etdi gerçi me'mûr Bî-kudret olur mı sarf-ı makdûr

> Bürhân ile hasmım etdim iskât Kur'ân ile tab'ım etdim isbât

Bahs-i Sâlis Der Umûm-ı Lüzûm

Serdâr-ı eimme-i eâzım Kılmadı salâta nazmı lâzım

İ'câzın umûmın etdi tasvîb Ma'nâya lüzûmın etdi tasvîb Bu bahsi beyânda dedi hattâ Ric'atlarıdır egerçi akvâ

770 Merd-i a'cemîyye aldı tefvîz Kendi lügatiyle ede ta'rîz

> Her devrde bir iki sühan-sâz Elbetde eder beyân-ı i'câz

Sarf etmeg ile hayâl-i sâfin Arz eyler edâ-yı i'tirâfin

Der Beyân-ı Mâhiyyet-i Şâirî

Şâir deme ehl-i dil demekdir Hôş-meşreb ü mu'tedil demekdir

Yoksa bir alay erâzil-i nâs Pes-mânde hôr-ı nevâl-i vesvâs

775 Peymâne-keş-i edâ olur mı Vahy-i dile âşnâ olur mı

> Şâirlige sûz ü derd lâzım Endûh u belâ olur mülâzım

Rûy u lebe etmeyip tenezzül Açsın çemeni görülmedik gül

Her râhda eyleyip tekâpû Şâhin-i hayâli ala âhû

Girdikde girîve-i hayâle Çarpılmaya dîv-i kîl ü kâle

780 Açılsa mebâhis-i maârif Kilki ola hasb-i hâle vâkıf

> Deryâ-yı şerâb-ı fikre dalsın Anı göreyim ki gevher alsın

Gevher dedigim degildir ol söz Kim bir yere gelmiş ola kaş göz

Mânende-i mâkiyân-ı garrâ Yek beyza hezâr fahr ü da'vâ Ekser Arabiyy ü nâdir elfâz Bi'lcümle gılâz ü aglâz

785 Bak bak ne güzel edâ-yı şîrîn Gül-bûse yanında lâ'l-i nûşîn

> Cem'iyyete kıl şu sözde dikkat Gîsû-yı siyâh şâm-ı gurbet

Hançer burada zihî nezâket Ebrûsına eylemiş işâret

Gerçi bu da haylice hünerdir Ammâ ki sühan yine dîgerdir

Bir şâir-i rind-i pâk-meşreb Dedi bu sözi makâma enseb

790 Hâyîde edâya sunma kim el Bir kerre dahi demişler evvel

> Çün şîve-i nâza mâiliz biz Bir tâze-edâya kâiliz biz

Yoksa ne nezâket ü ne mazmûn Da'vâ-yı fazîlet ile meşhûn

Nazm içre olur mı ilm ile lâf Ya söylemeyim mi eyle insâf

Tetimme-i Kelâm

Bulmuş sühan-ı bülend-nâmı Firdevsî-yü Husrev ü Nizâmî

795 Âyîn-i Nevâyî'de Fuzûlî Bulmuş sühana reh-i vüsûli

> İstanbul'umuzda Nev'i-zâde Etmiş tek ü pû velî piyâde

Olsun mı Nizâmî'ye hem-âheng Kur'ân'a uyar mı nağme-i çeng Olmaz belî lûtf-ı tab'ı inkâr Onun gibi dahi niçeler var

Her birisine hezâr tahsîn Hâsidlerine hezâr nefrîn

800 Tâ key sühan ez sühan rubâyîm Mâ ber ser-i kıssa-i hod âyîm

Miyânci Keşten-i Sühan Der Miyân-ı Îşân

Gördükde bu iki nev belâyı Fehm etdi meâl-i mâcerâyı

Gâh eyledi rûy-i Hüsn'e dikkat Gâh eyledi Aşk'a sarf-ı himmet

Mânende-i sîb ikisi yek-tâ Sûretleri sürh ü zerd-sîmâ

Bu hâl ana kec-nümûn göründi Bâzîçe-i bâz-gûn göründi

805 Rahm eyleyip ol iki cüvâna Bu oldı miyânci-i miyâne

> Bir vech ile eylemezdi bâver Kim Hüsn ola rûy-ı Aşk'a çâker

Mehtâbdan ol olur mı ümmîd Kim ola ketânı subh-ı câvid

Oldı reh-i fikreti muattal Pervâne için yanar mı meş'al

Âsâr-ı mahabbet âşkâre Mevcûda ne hâcet istihâre

810 Ammâ anı etmedi ki tahkîk Kimden kimedir bu sûz ü teşvîk

> Bu idi kabîle içre âdet Kim ede cüvân nigâra rağbet

Öyle idi resmi bu diyârın Hiç yokdı vukûı böyle kârın İkisi de gerçi kim nazar-bâz Ammâ biri kebk ü biri şehbâz

Hüsn'in dili zülfi gibi pâ-mâl Aşk eylemez ana hiç ikbâl

815 Gördi ki Sühan bu iki bî-dâd Bir başka yol eylemişler îcâd

> Hüsn'e ecıyıp himâyet etdi Tenhâya çağırdı sohbet etdi

Dedi ki benimle ol kafa-dâr Gel kılma bu kâr-ı sehli düşvâr

Kim böyle kuruldı tâ bu dîvân Muhtâc idi hüdhüde Süleymân

Tevfîka refîki eyle pey-rev Şâpûr'ı bul ol cihâna Hüsrev

820 Yâr ile olur vusûl-ı dildâr Zann-eyleme yârı yâre ağyâr

> Bu nükteyi reh-revân mukirdir Hem-râh ile râh ikisi birdir

Bu râha şitâb eden dil-âgâh Hem râhı bulup bulundı hem-râh

Tenhâ-rev olan ger olsa hurşîd Hûn içre olur makâmı câvid

Yâr ile olur vusûl-i mahbûb Hem yârdır anladınsa matlûb

825 Fi'l-vâki' edip o pîr himmet Günden güne tâzelendi ülfet

> Nâz ile niyâz olup mükerrer Sohbetler olurdı şîr ü şekker

Oldı heme dem be-vefk-i dil-hâh Birbirine müşterî iki mâh

Çok sürmedi n'eyleyim bu bâzâr Çok gördi bu zevki çarh-ı gaddâr

Bilmem ki ne rûzgâr esdi Gül soldı hezâr savtı kesdi

Hitâb-ı Sâkî

830 Sâkî duracak zaman mıdır bu Durmak n'ola imtihân mıdır bu

> Sâkî kerem et şerâb yağdır Ebr ol velî lâ'l-i nâb yağdır

Bu bey' u şirâdır etme âveh Ver gonca vü al hezâr dûzah

Dâğ-ı dile bir şirâre koy sen Ver jâle vü al hezâr gülşen

Sâkî bir içim şerâb yok mı Kan ağlayorum kebâb yok mı

835 Sâkî getir âb-ı ergavânı Yakdı beni âteş-i cüvânî

> Gam hastesiyim esîr-i hicrân 836 Nabza göre şerbet eyle ihsân

Pâyende midir sipihr-i bî-dâd Devr eyle direnge olma mu'tâd

Çün ömr edeyor şitâba himmet Bir iki ayağla eyle sebkat

Germ eyle hevâ-yı iştiyâkı Şerh eyleyeyim gam-ı firâkı

Peydâ Şüden-i Hayret ve Men'-i Îşân Ez Musâhabet

840 Mecnûn-ı siyeh-libâs-ı hirmân Ya'nî kalem-i güsiste-sâmân

> Leylâ-yı hayâle keşf edip râz Bu gûne eder kelâma âğâz

Kim vardı kabîle içre bir merd Hayret adı kendi şîr-i bî-derd Hâkimdi serâser ol diyâra Zâbit geçinir bu iki yâre

Câsûs-ı kazâdan oldı âgâh Kim Hüsn ile Aşk'dır hevâ-hâh

845 Gerdûn gibi cevre kıldı himmet Çekdi ara yerde sedd-i fürkat

Emr eyledi kim bu iki ser-bâz Birbirine olmasın nazar-bâz

Emrine tehâlüf emr-i düşvâr Ayrıldı ol iki mâh nâ-çâr

Seyr et ki sipihr-i bî-vefâyı Râhat komaz iki âşnâyı

Cây oldı cemâl-ı Hüsn'e çâder Bir mâh idi oldı ser-be-hâver

850 Hem Hazret-i Aşk o mihr-i rahşân Hûn-âb-ı şafakla oldı galtân

Hayâl Besten-i Hüsn

Hüsn öyle hayâl kurdı gûyâ Tenhâ ede Hayret ile gavgâ

Ya'nî ki çekip bir âh-ı cân-sûz Ol düşmene ola hânmân-sûz

Pend-dâden-i Sühan

Fi'l-hâl gelip Sühan yetişdi Ammâ ki bozuk düzen yetişdi

Hüsn'e niçe nusha etdi âğâz Kim Hayret'e olma nâvek-endâz

855 Ol merd ile düşmez inkisârın Âyînesidir cemâl-i yârın Âh-ı dilin etme zengî-i mest Âyîne-i Aşk'ı etme işkest

Bürhânları serd edip temâmî Bu oldı ki zübde-i kelâmı

Yıkmak bu binâyı nâ-revâdır Kim bir yüzi yârdan yanadır

Sen nâme yaz eyleyim ben îsâl Bir dem dahi böyle hôş geçir hâl

860 Hayret'le savaşma geç geçenden Hoşnûd ola ta ki Aşk senden

> Nâçâr kalıp hemen ol âfet Mektûb ile eyledi kanâat

Söz çokdı egerçi hâmesinde Kan ağlayayazdı nâmesinde

Ol nusha çü imtisâl kıldı Bu tarz ile arz-ı hâl kıldı

Nâme-i Hüsn Bâ Aşk

Ser-nâme-i nâme nâm-ı Yezdân Kayyûm u Kadîm ü Hayy ü Rahmân

865 Yerden gögi eyleyen ser-efrâz Gökden yere rahmet eden ifrâz

> Vîrân eden ârzû sarâyın İşkeste eden ümîd pâyın

Kâm-âver eden heves-gerânı Nâm-âver eden sühan-verânı

Nîk ü bedi yokdan eden îcâd Mansûbe-küşâ-yı rind ü zühhâd

Îsâr ola ba'd ez în tahiyyet Ol zâta k'odır şefî'-i ümmet

870 Ashâb-ı güzîn ü âl ü evlâd Ber cümle-i şân selâmhâ bâd Bu nâme o yâr-ı câna gitsin Bir âhdır âsmâna gitsin

Gerçi gam-i dil beyân olunmaz Âteş gibidir nihân olunmaz

Bu nâme ki bir fakîrdendir Gönli gibi kâğıdı şikendir

Bir zâlimedir ki pâdşehdir Nâmem nazârında hâk-i rehdir

875 Ey bendesine enîs olan şâh Şimdi ne sebebden etdin ikrâh

> Manzûrun olan şikeste bendim Şimdi kime bestesin efendim

Gerçi bilirim cüdâ degilsin Ol rütbe de bî-vefâ degilsin

Hep bildigimi tüketdi hicrân Bîmâr olan eylemez mi hezyân

Bir dâhiyedir ki düşdi nâgâh Encâmını vuslat ede Allâh

880 Düşdümse niyâza nâzenînim Elden ne gelir kafes-nişînim

> Zen her ne kadar ki tîğ-zendir Sâz-ı emeli bozuk düzendir

Ol dem ki seninle hem-nefesdim Ser-mest-i piyâle-i hevesdim

Ma'lûm idi kim ne gûnedir hâl Ger merd isen etme sen de ihmâl

Ol hâl güm oldı bî-mecâlim Âvâre idim şikeste-bâlim

885 Bu şehre gam-ı firâk geldi Vuslat gidip iştiyâk geldi

> Hayret bana vasla oldı mâni' Bir nâmeye sen de olma kâni'

Makbûl dutar mı şer'-i himmet Nâçâr işin ede ehl-i kudret Farz eyleyelim ki hâk-sârım Yok şübhe ki hâk-i pây-i yârim

Hurşîd ki şâh-ı âsmândır Ger zerreyi saymaya yamandır

890 Ey hâlime rahmi olmayan yâr Fikr eyle ki rûz-i âhiret var

> Yıllarca gül-i bahârın oldum Âhir ki hazân erişdi soldum

Etdim sana cân u serle rağbet Hem kudretim oldığınca hizmet

El-ân ki hâlim oldı müşkil Terk etme bu zârı merhamet kıl

Benden sana gayri olmaz ikbâl Vasl u ecelimden etme ihmâl

895 Ya vasl ile senden alırım kâm Ya merg ile zinde eylerim nâm

> Hayret beni kıldı zâr u muztar Gayret sana düşdi ey dil-âver

Ger var ise sende bana rağbet Var âh u figâna eyle âdet

Elbetde kabîle gûş ederler Vaslımla seni hamûş ederler

Âzürde isen bu mâcerâdan Cevr eyleme havf kıl Hudâ'dan

900 Ben eylemedim bu derdi îcâd Senden bana oldı bunca bî-dâd

> Ey ahterimi siyâh eden mâh Vehm eyle ki müntakimdir Allâh

Bir âfete sen de dûş olursun Âhım gibi şu'le-pûş olursun

Hasretde koma bu hâk-sârı Bir sözle tesellî eyle bâri

Şükr eyle Hudâ'ya ey semen-ten

Ya sen ben olaydın âh ben sen

905 Rüsvâylığım edersen ikrâh Göster bana doğrusın nedir râh

> Âşıkda hayâ karâr eder mi Mikdârını şey güzâr eder mi

Sende bilirim bu derd yokdur Çarhın belî rûzgârı çokdur

Ma'lûm degil verâ-yı perde Çok bilmeyen uğradı bu derde

Belli ki kabîle içre âdet Senden banadır hemîşe rağbet

910 Er kim ede nâm-zedden ikrâh Duhter kalır evde hâh-nâ-hâh

> Hiç âh ü enîni çâre vermez Tûfân-ı gamı kenâre vermez

Benden gam u derd ü sûz-ı takrîr Senden biter iş sen eyle tedbîr

Söz erdi hitâma işte ey mâh Hayr ede netîcesini Allâh

Âverden-i Sühan Nâmerâ Ber Aşk

Ol dem ki kelâm erip hitâma Dest-i Sühan'a verildi nâme

915 Aldı Sühan azm-i râh kıldı Hüdhüd gibi kasd-ı şâh kıldı

> Buldı gelip Aşk'ı lâl ü hâmûş Âyîn-i kadîmi üzre medhûş

Ne dûzah-i gam ne zevk-i dîdâr Gûya ki ne yâr var ne ağyâr

Dedi ki Sühan yeter bu ahvâl Bu nâmeyi aç da gör nedir fâl

Hem bak ki Cenâb-ı Hüsn-i yektâ

Senden nice eylemiş teberrâ

920 Bin ye's ile eyleyip şikâyet Fürkat sözin eylemiş hikâyet

> Aşk ol sözi gûş edip ayıldı Tekrâr düşüp yine bayıldı

Bir nice zamân geçip özinden Geldi söze kan gelip gözinden

Sordı ki ne gûne nâmedir ol Göster ne siyâh-câmedir ol

Çün aldı nigâh edip serâpâ Fehm etdi nedir meâl-i da'vâ

925 Ol an alıp eline hâme Yazdı o da bir çevâb-nâme

Sûret-i Nâme-i Aşk

Ser-nâme-i nâme nâm-ı Sübbûh Peydâ-kün-i akl u hâlik-i rûh

Ma'mûr eden âlem-i belâyı Mehcûr eden iki âşnâyı

Hüsn'i eden âftâb-ı rahşân Aşk'ı eden âteş içre büryân

Me'yûse veren ümîd-i vuslat Me'nûsı eden esîr-i hasret

930 Niçe salavât o Resûl'e Şâhenşeh-i a'zem-i Betûl'e

> Hem niçe selâm ola havâle Evlâd-ı kirâm ü cümle âle

Bu nâme ki bir siyeh şererdir Hâkister-i şu'le-i cigerdir

Bir cennetedir ki reh-güzârı Dûzahdır anın gül-i bahârı Söz gerçi ki hâl-i zindegândır Geh mürdeyi söyletir cihândır

935 Ey bendesin öldürüci hünkâr Tedbîr nedir elimde nem var

> Nâmen dil-i zâra vâsıl oldı Ok degdi ve yara hâsıl oldı

Bilmem ne füsûndı ol fesâne Dûzah haberin getirdi câna

Dûzah dedigim ne câna minnet Bir söz var içinde adı fürkat

Bir niçe zamân ki lâl idim ben Ol havf ile pür-melâl idim ben

940 Sandın beni görmeyip uyanık Ma'şûk benim de sensin âşık

> Ben ise bu vakti eyleyip yâd Hayrânlığı dil ederdi mu'tâd

Bir çâresizim nedir bu cebrin Billâh ne tiz tükendi sabrın

Ey kendini bende add-eden şâh Yûsuf'dur olan fütâde-i çâh

Hûn sanma görüp elinde hınnâ Bî-behredir aşkdan Züleyhâ

945 Ey gül deme pâre pâre hûnum Zann-etme ki bülbül-i zebûnum

> Gül-gûnedir olsa hûn degildir Bülbül sözi gül-füsûn degildir

Zann-etme ki gam harâbı sensin Rûşen günün âftâbı sensin

Şûrîde benim ki bin gamım var Her gamda yine bin âlemim var

Gördün bu tahammül içre hâlim Var sandın ola ferâğ-ı bâlim

950 Bülbülde görüp figân heyhât

Pervâneye töhmet etdin isbât

Bu yolda egerçi kâr çokdur Deryâ-yı gama kenâr yokdur

Ammâ buna hükm-eder ki yârân Pinhân gerek ola derd pinhân

Çün istedin ola âşkâre Âsân görünür figâna çâre

Gavgâ-yı mahabbet ise maksûd İşte felek işte âh-ı pür-dûd

955 Min ba'd men ü sanem-perestî Heyhât heyhât zühd ü hestî

> Çün sen diyesin ki eyle efgân Tûfânı sayar mı çeşm-i giryân

Tedbîrime çünki rağbetin var Min ba'd figândan olma bîzâr

Gam defterinin resîdi yokdı Senden bana kâm ümîdi yokdı

Ol dâiye ber-tarafdı evvel Şimdi buna çıkdı iş muhassal

960 Fermân senin husûli benden Cân verme benim kabûli senden

> Seyr'et nic'olur figân ü zârî Da'vâ ne şekil verir karârı

Bed-ahdlik ummazam özümden Ger haşr ola dönmezem sözümden

Tedbîr budur ki ederim ben Ey gözleri haste hôş-dil ol sen

Sadât-ı kabîle în ü ândır Çeksinler eli ki baş ü cândır

965 Bu yolda kim ola sedd-i râhım Cân zâd-ı rehim Hudâ güvâhım

> Sabr eyle biraz sen etme efgân N'eyler bakalım Hudâ-yı zî-şân

Bu nâmemi sakla hırz-ı cân et Ol ahdi ki eyledin amân et

Sıfat-ı İsmet Ki Dâye-i Hüsn Bûd

Çün oldı cemâl-i Aşk'dan dûr Hüsn oldı o fikret ile rencûr

Etmişdi o şem'i zîb-i zânû İsmet deyerek bir âteşîn-hû

970 Perverde-i şîr edip mukaddem Vermiş o güle arakla şebnem

> Kılmış anı mevsim-i sabâda Cûbâr-ı hayâdan âb-dâde

Tenhâda figânın eyleyip gûş Duydı gam-ı Hüsn'i oldı bî-hûş

Çün perdeden aşdı sâz-ı fürkat Gûş etdi usûli ile İsmet

Hiss-eyledi kim o mâh-pâre Bir mihre diler k'ola sitâre

975 Bilmezdi nedir bu gûne derdi Kangı gül içindir âh-ı serdi

> Her gece bakıp o dil-nüvâze Gönlinde yakardı dâğ-ı tâze

Ol dâğ yakınca hasret ile Bu zülfin ederdi hep fetîle

Âh eyleyicek o serv-kâmet Başına kopar bunun kıyâmet

Ol eşkin edince seyl-i deryâ Bî-çâre olurdı rû-be-sahrâ

980 Hüsn etmede idi dem-be-dem âh Bir Aşk bilirdi bir de Allâh

Âgâh Geşten-i İsmet Ez Gam-ı Hüsn

İsmet buna sordı sûz-ı derdi Gûş etdi cevâb âh-ı serdi

Hüsn eyledi mâcerâyı takrîr Rü'yâsını etdi böyle ta'bîr

Kim haste-i aşka sorma derdin Depretme o bî-kesin neberdin

Geldi başıma bu bir kazâdır Allâh bilir ne mâcerâdır

985 Bî-derde olur mı derd takrîr Ez-cümle ola verâ-yı ta'bîr

> Pervâneye sorma hâhişinden Sevdâsını anla sûzişinden

Bilsem ki nedir bu sûz ü gavgâ Etmezdim esâs-ı sabrı yağmâ

Ol âteş-i gam ki düşdi câna Lûtf eyle ki düşmesin zebâna

Çarh etdi beni esîr-i hicrân Bu teşneyi kıldı sîr-i hicrân

990 Tenhâ eder iken âh ü feryâd Gûş eyleyip etme sen de bî-dâd

> Yazık sana kim tebâh olursun Âzürde-i tîr-i âh olursun

Sen dinlemek ile medd-i âhı Rüsvâylığın göründi râhı

Şimden gerü şöhre-i diyârım Günden güne gamla bî-karârım

Âteş-geh-i sînem oldı berbâd Yandım bu hevâda işte feryâd

995 Gam kâbesinin budur hevâsı Efgândır o ma'bedin duâsı

Ümmîdi tabîbden sikamdır

Matlabları izdiyâd-ı gamdır

Her kim ki bu râha etdi rağbet Reh-zendir o reh-reve selâmet

Hem-rehligim ile etme ikrâh Rüsvâylığa bilir misin râh

Çün yârdan oldı yâr mehcûr Rüsvây ola hâh hâh mestûr

1000Cânân ki fedâ ede bu cânı Yetmez mi belâ-yı zindegânî

Çâre Endîşîden-i İsmet

İsmet işidince bu cevâbı Efkârını aşdı ızdırâbı

Söyletdigine olup peşîmân Gûş u lebe urdı muşt-ı hüsrân

Dedi ki ne derde düşdüm eyvâh Kendim aradım da oldum âgâh

Yakdım bu şererle hânmânı Ey kâş işitmeseydim anı

1005Kûr ü ker olaydı çeşm ü gûşum Zehr olmaz idi bu ayş ü nûşum

> Şimdi bu belâ ki çâre müşkil Bîmâr zaîf ü derd kâtil

Besbelli ki derd-i aşkdır bu Bir râh-neverd-i aşkdır bu

Yâdına gelince oldı hâmûş Aşk adını eylemiş ferâmûş

Bir nesne mi var ki ola mübhem Aşk olmasa hiç olur mı bu gam

1010Lâkin buna tesliyet gerekdir Bu goncaya terbiyet gerekdir

Zu'mınca olup fesâne-perdâz

Ser-nâme-i nusha etdi âğâz

Münâzara-i İsmet Bâ Hüsn

Dedi ki eyâ gül-i murâdım Nev-reste-i gülşen-i fuâdım

Her derd ki var devâsı vardır Her haste ki var şifâsı vardır

Efsâne-i ye'se olma mu'tâd Düşdünse de aşka etme feryâd

1015Gâyet hazer et ki ey gül-endâm Bu nutkunı duymasın leb ü kâm

> Efgânını eyleme ziyâde Nâmûs u hayâyı verme bâda

Bir harf ki lebden ede pervâz Bin gûşda olmaz âşiyân-sâz

Ol sırrı ki hoşça dutmadın sen Bir sînede eylemez neşîmen

Sır şâhdır ana ihtimâm et Koğma ev içinden ihtirâm et

1020Kim sonra sipâh olup haberdâr Hem sen hem evin olur nigûn-sâr

> Söz dut kerem ü inâyet eyle Esrârı deme himâyet eyle

Her renge boyan da reng verme Mir'ât-ı safâya jeng verme

Sözdür dil ü câna berk-ı hırmen Ayrılmasın ol şirâre senden

Hem kendi nişân olur hevâya Hem düşdügi yer gider hebâya

1025Harf atdığı-çün kemân cihânda Hamyâzeden olamaz amanda

> Esrârını halka fâş edersin Havfım bu ki sen telâş edersin

Pâsûh Dâden-i Hüsn Bâ İsmet

Hüsn ol sözi gûş edip üzüldi Zehr ağladı acı acı güldi

Dedi ki aceb yola gidersin Seyl-âba karâr hükm edersin

Mümkin mi ki aşkı edem inkâr Sen anladığın degil bu esrâr

1030Bilmezsin ilâc bâri sorma Bîmârı tekerleme-yle yorma

> Sandım ki kelâm-ı aşk söyler Ben zâra peyâm-ı Aşk söyler

Sen hod bırakıp o bahsi der-kâr Mir'ât dedin gehî geh esrâr

Teng oldı derim başıma gerdûn Şimdi ne gerek hum-ı Felâtûn

Nâmûs ne şey hayâ ne sözdür Pervâneye mûmyâ ne sözdür

1035Ben âteşe eylerim tekâpû Dersin ki yol üzre var korku

> Gâh şâh u sipâha etdin âheng Geh verme dedin safâya hiç jeng

Ben sarhoşı olduğum ne meydir Sen nehy buyurduğun ne şeydir

Lâzımsa eger sana fesâne Sen dinle ben eyleyim terâne

Deryâ gibi birden eyleyip cûş Ey Aşk dedi ve oldı hâmûş

Behâne-i Dîger Engîhten-i İsmet

1040Hâlin görüp İsmet-i yegâne Buldı yine başka bir behâne

> Dedi ki cenâb-ı Aşk-ı yektâ Bir merddir ol ki bî-muhâbâ

Mektebde seninle hem-sebakdır Bu söze kabîle yek-nesakdır

Elbetde sen ana nâm-zedsin Kâm-âver-i vuslat-ı ebedsin

Gelmez ana da bu kâr mahbûb Sen tâlib olup ol ola matlûb

1045Bir kerre bu söz olursa meşhûr Rüsvâylığı dutar mı ma'zûr

> Hâhiş-ger isen de bî-zebân ol Kızsın kerem eyle sen girân ol

Havfim ki duyarsa hazret-i Aşk Eyler seni tîğ-i gayrete meşk

Çîzî-i Dîger Endîşîden-i Hüsn

Hüsn etdi bu nutka zihnini sarf Çün Aşk demişdi harf-ber-harf

Dedi ki ölüm ne cândır ey cân Fevt olmasa ger rızâ-yı cânân

1050 Ben havf ederim melûl olur yâr Sen havfdasın ki eyler âzâr

Olmuşdı bu haste-hâl medhûş Bu hücneti eylemiş ferâmûş

Sen bilmeyerekden etdin âgâh Sen âh dedin ben anladım mâh

Dil-teng olayım ve mühr-ber-leb Darılmaya tek o gonca-meşreb

Kan yutayım etmeyim anı fâş

El yâreme olmasın nemek-paş

1055 Yansın gamına bu cân-ı bî-bâk Tek gamzesi olmasın zehir-nâk

Bin ba'd olayım sükûta mu'tâd Ölsem dahi nâmın etmeyim yâd

Hey bu ne sitemdir Allah Allah Hem âteşe yan hem etme eyvâh

Te'kîd-i İsmet

İsmet dedi yok bu kâra çâre İnsâf vere Hudâ o yâre

İğzâb oluyor figândan ol mâh Çeşmi kararır ger eylesen âh

1060 Der kim o figân bana gerekdir Mahbûba hemîn vefâ gerekdir

Sükûn Yâften-i Hüsn

Gûş etdi bu kavli hâh-nâ-hâh Nâz eyleme kasdın etdi ol mâh

Kânûn gibi oldı câyı gûşe Sûretde çekildi ayş ü nûşe

Âgâhî Dâden-i Sühan Ber Aşk

Bu mebhasi etmek için iz'ân Olmuşdı Sühan da anda pinhân

Gûş etdi temâm-ı mâcerâyı Dinlerdi meger bu müddeâyı

1065 Çün oldı Sühan bu sırra vâkıf Etdi gelip Aşk'ı dahi ârif Kim Hüsn senin-çün oldı dil-sûz İnsâf kıl imdi ey dil-efrûz

Lâyık mı ki Hüsn edip figânı Sen kılmayasın fedâ bu cânı

Billâh bu mı resm-i aşk-bâzî Dildâr ede şîve-i niyâzı

Şimden gerü hâhişin ziyâd et Endûh-ı firâka i'tiyâd et

Hâl-i Aşk

1070 Evvel ise Aşk-ı bî-serencâm Ol şîr-nihâd ü haste-endâm

> Tenhâ yakıp âh-ı sîne-sûzın Birkaç gece hoş geçirdi rûzın

Kâfûrını sakınıp şererden Nûr aldı fetîle-i seherden

Ya'nî ki hayâl-i rûy-ı cânân Eylerdi şebin sabâha mihmân

Efkâr-ı gam eylese teselsül Gîsûsın ederdi hep tahayyül

1075 Kıldıkca şerâb-ı şevkı ser-hôş Lâ'l-i nemekin ederdi hâmûş

> Oldıkca muhît-i gamda güm-nâm Hüsn adın anıp bulurdı ârâm

Etmişdi firîb va'd-ı kemmûn Bâğ-ı emele riyâz-ı lîmûn

El-hâsıl olurdı Aşk-ı çâlâk Ümmîd-i visâl ile ferah-nâk

Ber Geşten-i Kâr Ve Mecnûn Şüden-i Aşk Der Hevâ-yı Hüsn

Vaktâ ki duyuldı kâr-ı fürkat

Gönlinde kırıldı hâr-ı fürkat

1080 Ol cism-i latîf-i nûr-peyker Göz merdümi gibi oldı lâgar

> Bilmezdi ki çarh-ı kâr-nâ-sâz Fürkatde vere karâr nâ-sâz

Vuslat güni hoş hoş eyleyip îş Akşamını eylemezdi derpîş

Dildârını kendiye görüp yâr Sanırdı ki çarh için bekâ var

Degmez mi meger degil mi lâyık Zevk-i dü cihâna nâz-ı âşık

1085 Ma'şûk niyâzı kılsa âdet Dûzahda var âşıka saâdet

> Ol devleti hazm olur mı mümkin Bir anı deger cihân mülkin

Fürkat bunun üstine belâdır Az âşık o derde mübtelâdır

Düşmez olur olmaz aşk-bâza Kim döndüre nâzını niyâza

Kim uğradı bu gam-ı elîme Firdevsden atılıp cahîme

1090 Yâr olmuş idi buna heves-nâk Bîçâreye ejder oldı tiryâk

> Sayyâd ki bin füsûn okurdı Bin Tebbet-i vâj-gûn okurdı

Çün âhûyı eyledi giriftâr Bî-gâile çekdi tîğ-i âzâr

Gam şerhi hulâsa mücmel olmaz Tafsîl olunup muhassal olmaz

Gelsin mi o âhlar beyâna Bir nebzesi sığmaz âsmâna

1095 Derd âlemidir dil-i şerer-nâk Almaz o nücûmı zîc-i eflâk Söz kanda bu kulzüm-ı belâdan 1096 Efgân yanar bu mâcerâdan

Zârîden-i Aşk

Çün Aşk Hüsün'den oldı me'yûs Feryâdı kopardı dest-i efsûs

Bin gevher-i eşk ile edip yas Zahm-ı cigere ekerdi elmas

Söz söyleyemezdi hayretinden Hâmûş olamazdı dehşetinden

1100 Almışdı dilin belâ-yı cânân Çeşminde ne dûzah u ne tûfân

> Gönli kırığın döküp gözinden Âteş dökülürdi her sözinden

Verdikde nefes yem-i belâya Sığmazdı habâb-veş semâya

Dûzahda edince âh-ı serdi Reşk-âver-i zemherîr ederdi

Hasretle edince girye vü âh Eylerdi temûz-ı germi dey-mâh

1105 Geh söylenip âftâba karşu Âteş kor idi habâba karşu

> Geh encüme eyleyip nigâhı Ol kişti yakardı berk-ı âhı

Mecnûn gibi deşti etmeyip câ Her şehre ki bakdı oldı sahrâ

Ol rütbede dökdi eşk-i pür-tâb Kim oldı cihân serâb u girdâb

Za'f ile çü rişte-i şerâre Râh-ı adem açtı her diyâre

1110 Çün peşşe olup zaîf ü nâ-kâm Nemrûd-ı sipihri kıldı sersâm Bir rütbe zaîf idi ki ol mâh Gâhîce olurdı âha hem-râh

Ammâ ki kemâl-i heybetinden Arş titrer idi mehâbetinden

Tek Hüsn için Aşk âh kılsın Dünyâ yıkılırsa ha yıkılsın

Bir sîne ki gamdan ola derhem Gönlinde midir harâb-ı âlem

1115 Hoşdur yıkılırsa çarh-ı gaddâr Hoşnûd ola tek cenâb-ı dildâr

> Çıkmışdı aradan Aşk-ı çâlâk Ger yansa ne gam zemîn ü eflâk

Çün bulmaya anda kimse râhat Fülk-i felege gerek felâket

1118 Gâhîce ki gamdan ola berbâd Eylerdi bu şi'r-i pâki inşâd

Tardiyye

Ι

Bir şâha esîr oldı kim dil Her bendesi Kahramân-ı kaatil Gamze-yle sitemde lâ'li yek-dil Bîgâne nigâhı kana mâil Tîr-i gamı câna âşnâdır

II

Dîvân-ı kazâsı zulm-bünyâd Lerzende-i bîm-i cânı cellâd Her gûşede bang-i dâd ü bî-dâd Gavgâ-yı kıyâmet âh ü feryâd Mahşer mi yahud bu Kerbelâ'dır

III

Lâ'l-i lebi ömr-i Nûh-ı ma'nâ

Çeşminde nühüfte rûh-ı ma'nâ Hep dökdigi kan sabûh-ı ma'nâ Feyz-i sühanı fütûh-ı ma'nâ Her nutkı hayâtdır bekâdır

IV

Zülfin dağıdıp ederse tâlân Küfre sığınır sipâh-ı îmân Bu havf ile kâküli perîşân Da'vâsına tîğ-i katli bürhân Veh bu ne acîb müddeâdır

V

Bîçâre gönül gamı-yle yansın Tek ol büt-i âteşîn inansın Hûn-âbe-i hecre cân boyansın Mahmûr gözi şerâba kansın Her kahrına bin Kerem fedâdır

VI

Gâlib gibi sad hezâr meftûn Sahrâ-yı mahabbetinde Mecnûn Olmaz yine kimse zâr u dil-hûn Her cevrine ehl-i derd memnûn Ammâ ki ne çâre bî-vefâdır

Der Sıfat-ı Gayret Ki Lâlâ-yı Aşk Bûd

Var idi yanında bir belâ-keş Gayret adı her peyâmı âteş

1120 Lâlâsı idi o bî-mecâlin Ebri-ydi o gevher-i hayâlin

> Etmişdi o şem'-i sîne-sûzı Bezm-i elemin harem-fürûzı

Çün tıfl-ı şerer o dil-figârı Beslerdi ki yaka her diyârı

Çün merdüm-i çeşm-i ehl-i sevdâ

Her dem kara giydirirdi ana

Yıldan yıla tohm-ı lâle-âsâ Saklardı ki dâğın ede peydâ

1125 Çok eyledi penbelerde pinhân Tâ dâğ-veş ola dopdolu kan

> Çün tıfl-ı sirişk o dil-nüvâzı Gerd-i gamın etdi hâk-bâzı

Tâ kim büyüdükde ola ol mâh Çün seng-i mezâr rûy-ber-râh

Tevbîh Kerden-i Gayret Bâ Aşk

Çün Aşk'da gördi derd-i hasret Fursat bulup ana sordı Gayret

K'ey gonca-i şu'le-zâr-ı dûzah N'oldı ki edersin öyle âveh

1130 Bâis ne bu rütbe âh-ı serde Noksân mı erişdi yohsa derde

> Derdin ne sakın devâ mı buldun Bu nâle nedir sifâ mı buldun

Ger derd için eyledinse feryâd Efsûs bana hezâr bî-dâd

Çün mühmeli merd geldi derdin Derd olmalıdır şiârı merdin

Pâsuh Dâden-i Aşk

Aşk acı acı bakıp o merde Zehr ekdi nigehle dâğ-ı derde

1135 Dedi buna bâ-haber misin sen Hüsn adını gûş eder misin sen

> Var git ki sözüm sana degildir Sus sus bu o mâcerâ degildir

Yârâna yetişmege kıl ikdâm

Dön kim geri kaldı sabr u ârâm

Âhımla bu rûzgâr dolsun Sen git de ne olmalıysa olsun

Dil-şâdlığım zamân nic'oldun Söz söyleyecek zamân mı buldun

1140 Ben bunda yokum gel etme ârâm Kim bahsedip ede şimdi ilzâm

Pâsüh Dâden-i Gayret

Gayret dedi kim bu yârlıkdır Maksat sana gam-küsârlıkdır

Hâşâ sana ta'n ola bu güftâr Dildâr-ı kadîme etme âzâr

Lâkin gam u âh çâre vermez Bu kulzüm-i hûn kenâre vermez

Terk eyle bu rütbe hûy u hâyı Boş boşuna kûh-veş sadâyı

1145 Bir zahm ile kendin eyleme gayb Feryâdı bırak ki aybdır ayb

> Yoksa bunı sen kolay mı sandın Gam leşkerini alay mı sandın

Pâsuh Dâden-i Aşk

Aşk ana bakıp dedi nedir rây Yâ Rab ne belâya uğradık vây

Söz anlamadan mı kaldı Gayret Ya bana mı ârız oldı lüknet

Lâzım mı her âh hasret olmak Her girye hemân şikâyet olmak

1150 Ma'zûr dut ey refîk ma'zûr

Me'mûrdur Aşk âha me'mûr

Pâsuh Dâden-i Gayret

Gayret dedi ahlar güzeldir Ammâ ki ne sûd bî-mahaldir

Bu deştlerin verâsı yokdur Hüsn'ün de buna rızâsı yokdur

Pâsuh Dâden-i Aşk

Aşk ana dedi ki bî-hıredsin Dermânde-i fehm-i nîk ü bedsin

Hüsn olmasa ger bu âha hoşnûd Bir ânda olurdı çarh nâ-bûd

1155 Sen âhı buhâr-ı ser mi sandın Feryâdımı bî-eser mi sandın

Yâr uyhusına fesânedir hep Bezminde anın terânedir hep

Leylâ'ya gülünc olur muhassal Nevmîdi-i Kays ü sa'y-i Nevfel

Behâne-i Dîger Engîhten

Gayret çekip âh-ı sîne-sûzı Deycûra mübeddel etdi rûzı

Dedi ki hezâr bâreka'llâh Âgâh imiş Aşk oldum âgâh

1160 Ammâ sana bir hevâ gerekdir Ma'şukuna iddiâ gerekdir

> Var iste kabîle içre yârin Şehbâzsın al hemân şikârın

Efgânı ko eyle azm-i dildâr Bin re'ye olur netîce bir kâr

Ben dahi seninle hem-süvârım Kühsâr-ı belâda yâr-ı gârım

Ol şart ile kim sen eyle himmet Tâ küşte-i kahrın ola İsmet

1165 Ya bana ver ol husûsa destûr Tâ İsmet'i kahrım ede makhûr

> Dut bu sözümi ki hayrdır hayr Gayret ara yerde istemez gayr

İsmet sebeb oldı oldı Hayret Yek-dillere reh-nümâ-yı fürkat

Bu vak'aya sen de âşnâsın Bilmem ne hayâle mübtelâsın

Çâk olmayıcak sadef ne kâbil Olmak güher-i murâd hâsıl

Âzürden-i Aşk

1170 Aşk ağlayarak dedi ki hâmûş Bir yol Sühan'ın sözini kıl gûş

> Hiç tîr atılır mı yâre doğru Doğrulma sen ol diyâre doğru

Ger var ise sende bir mürüvvet Hem-râhım ol eyle bana hizmet

Ne havf-ı ser ü ne fikr-i cân et Bâzârıma uy da bir ziyân et

Dîvâneye râh olur mı ta'rîf En puhtesidir bu hâm teklîf

1175 Hiç tîğe olur mı arz-ı dîdâr Âyîne midir ya her güher-dâr

> Gel yanıma el verirse böyle Yoksa iyi gördigini söyle

Gelmiş bana şart u ahd söyler Zen gibi nevâ-yı mehd söyler

Ger şöyle olursa böyle olsun Ya böyle olursa şöyle olsun

Bir medrese bahsi eylemiş derc İster bana ede cümlesin harc

Muvâfakat-ı Gayret Bâ Aşk

1180 Gayret dedi ahdim olsun ey yâr Bî-ser olayım sana kafa-dâr

> Bir dahi dehânım etmeyim bâz Kalsın bu kafesde tûtî-i râz

Ger çarh muhâlefet ederse Başım vereyim kılın giderse

Sanma reh-i râhata giderdim Ben şevkını imtihân ederdim

Yan çizdi sanıp bu pür-melâli Güftâr ile etme infiâli

1185 Böyle kılıç atlayınca Gayret Aşk eyledi kaş ile işâret

> Gel yanıma olalım revâne Geçdi geçen eyleme behâne

> Bu niyyete fâtihâ deyip Aşk Âğâz-ı visâle eyledi meşk

Tâlib Şüden-i Aşk Akd-i Hüsn Râ

Gayret'le cenâb-ı Aşk-ı çâlâk Maksûda ki oldılar heves-nâk

Mollâ-yı cünûn verdi fetvâ Kim Hüsn için oldı farz gavgâ

1190 Kasd etdi ki ola Aşk-ı gam-hâr

Ahvâl-i kabîleden haberdâr

Her biri arardı vasla çâre Âşık geçinirdi ol nigâre

Bu resme gerek belâ-yı düşvâr Yek başına Aşk âlem ağyâr

Cem' eylediler kabîleyi hep Aşk eyledi anda arz-ı matlab

Kim gevher-i Hüsn'e tâlibim ben Gavgâ-yı talebde gâlibim ben

1195 Ol dürr ise dil ana sadefdir Cânân ile cân halef selefdir

> Ger Hüsn ise âftâb-ı rûşen Gerdûnı o nûrun olmuşum ben

Gavgâya eger düşerse tedbîr İşte kalem işte tîğ u şemşîr

Her hasmı ki tîğim etdi berbâd Mersiyyesini ben etdim inşâd

İstihzâ-yı Kabîle Ki Zihî Genc-i Bî-renc

Sâdât-ı kabîle-i Mahabbet Birbirine etdiler işâret

1200 Kim yâveye başlamış bu bî-dil Mecnûn'a nedir devâ-yı âkil

> Her biri takıldı hasb-ı tâka Bîçâreyi aldılar mezâka

Kimi dedi tîğin eyleme tîz Afyona begâyet eyle perhîz

Kimi dedi hûlyâ belâdır Eyvâh bu derd bî-devâdır

Kimi dedi etme şi're rağbet Zîrâ ki verir hayâle sûret

1205 Kimi dedi tahtınız mübârek

Şâhım ola bahtınız mübârek

Kimi dedi hayli turfa meczûb Eğlenme degil mi yoksa matlûb

Kimi dedi işte derd-i hummâ Fasd eylemeyince böyledir ha

Kimi dedi var elinde şemşîr Mecnûn'un olur devâsı zencîr

Kimi dedi söylenir ya zâhir Zîrâ telef oldı mâlı vâfir

1210 Her bâbdan açılıp kapular Güftâre boşandı yâve-gûlar

> Ser-rişte bulup bir iki miksâr Ders-i galâtâtı etdi tekrâr

Baş ağrıdırım egerçi ahbâb Zükkâma nefîlidir bu güllâb

Bir vakt-i zamân hamâma gitdim Bilmem ki ne eyledim ne etdim

Hammâm dediniz de geldi yâda Bir mâddiye cümleden ziyâde

1215 Evvel anı eyleyim hikâyet Bir şeyhden eyledim niyâbet

> Ger söyledigi hep olsa i'lâm Bulmaz bu risâlemiz son encâm

Velhâsıl o merdek-i çep-endâz Bin halt-ı kelâma etdi âğâz

Serd etdi hadîs-i zû şücûnı Nekl eyledi mûceb-i cünûnı

Kaldı ara yerde Aşk u Gayret Zevklendi bütün Benî Mahabbet

1220 Mebhût kalıp o merd-i çâlâk Arz eyledi Hüsn'e sîne-i çâk

> Hüsn öylece verdi kim peyâmın Gûş eyle kabîlenin kelâmın

Anlar ne ki re'y ederse izhâr Re'yim benim oldur olma bîzâr

Tazarru' Kerden-i Aşk Bâ Kabîle

Nâ-çâr kalıp o merd-i hayrân A'dâlara oldı abd-i fermân

Sordı sebebi nedir bu bî-dâd Kim etdi kabîle anı îcâd

1225 Mûceb ne ki suhre oldı hâlim Haml oldı fezâhata makâlim

> Nush etmenize ne oldı hâil Ma'kûle degil miyim ya kâil

Ger tâlib-i Hüsn olursa mecnûn Tîmâr-hâne olur bu gerdûn

Zecrin sebebin beyân buyurun Cürmüm var ise ıyân buyurun

Cevâb-ı Şâfî Dâden-i Kabîle

Sâdât-ı kabîle cümleten hep Kıldılar ana beyân-ı matlab

1230 K'ey tâlib-i Hüsn olan hıred-mend Gûşunda durursa gevher-i pend

> Fikr eyle ki cümle âşnâyız Hep şûr ü hevâya mübtelâyız

Bir sözle kim oldı yâre vâsıl Bir gonca ile bahâre vâsıl

Hiç mümkin olur mı rencsiz genc Çok kimseye erdi gencsiz renc

Zevklenmemize degil mi ahrâ Birden bire vasl-ı Hüsn'i da'vâ 1235 Hiç sözle olur mı vasl-ı dildâr Lûtf et bu kelâmı etme tekrâr

> Da'vâmızı sanma hîlemizden Var Kays'a da sor kabîlemizden

Bî-mihnet ü gam vusûl-i dildâr Âyâ kime oldı bu sezâ-vâr

Hiç kimse bu râha gitmemişdir Bir ferd bunı işitmemişdir

Meydanda ki baş içindir efser Ser ver k'olasın bu yolda ser-ver

Kabûl Kerden-i Aşk Belâhârâ

1240 Aşk anladı kim nedir serencâm Gavgâ-yı makâle verdi ârâm

> Dedi buyurun ne ola hizmet Min ba'd men ü belâ vü mihnet

Sâdât-ı kabîle etdi tedbîr Kim mehrine eyle nakdi tevfîr

Hüsn akdine çok bahâ gerekdir Evvel sana kîmyâ gerekdir

Durma sefer et diyâr-ı Kalb'e Cân baş ko reh-güzâr-ı Kalb'e

1245 Ol şehrde kîmyâ olurmuş Yolda belî çok belâ olurmuş

> Bin başlı bir ejder-i münakkaş Mumdan gemi altı bahr-ı âteş

Bin yıllık yol harâbe-i gam Anın ötesi sarây-ı mâtem

Meşhûr o yolun başında câdû Her mûyı yılan yalan degil bu

Bir deşt içinde dîv ü perrî Arslan kaplan vuhûş-ı berrî 1250 Cin nev'i hezâr bed-likâlar Câdû kılığında ejdehâlar

> Muzlim gecelerde gûl-i yâbân Âvâzesi ra'dden nümâyân

Sihr ile yağar o deşte âteş Gâhîce ef'î-i münakkaş

Allah muîn olup geçersin Kalb şehrinin âbını içersin

Kıl andaki kîmyâyı hâsıl Gel bunda ol işte Hüsn'e vâsıl

Sefer Kerden-i Aşk Be Diyâr-ı Kalb Ve Ser-encâm-ı Vey

1255 Aşk oldı bu müjdeden ferah-nâk Bin şevk ile kıldı câmesin çâk

> Fi'l-hâl sorup diyâr-ı Kalb'i Dutdı reh-i reh-güzâr-ı Kalb'i

Gayret de olup ana kafa-dâr Kıldı iki yâr azm-i dildâr

Çün girdi o merd-i râh râha Evvel kademinde düşdi çâha

Sıfat-ı Çâh u Dîv ve Ser-güzeşt-i \hat{U}

Ammâ ki ne çâh çâh-ı girdâb Mânend-i ebed verâsı nâ-yâb

1260 Gayret dedi ana ey fedâyî Kârûn'a sor imdi kîmyâyı

> Bir çâh bu kim sevâd-ı a'zem Gencûr-ı künûz-ı ye's ü mâtem

Ne râh-ı adem ne zulmet-âbâd Bir çâh içi figân u feryâd

Deycûr-ı firâkdan nişâne

Bahr-ı zulümât-ı bî-kerâne

Düşse buna Hızr olup da güm-râh Olur yarı yolda ömri kûtâh

1265 Mihr atsa kemend-i mâh u sâli Yok ka'rını bulmak ihtimâli

> Çün düşdi o çâha mâh-ı Nahşeb Lâyık k'ola nâmı çâh-ı Nahşeb

Düşdügine eyleme teessüf Mi'râcını çehde buldı Yûsuf

San zülfine cây olup zenahdân Hârût'a buluşdı mâh-ı Ken'an

Velhâsıl o mihr-i âlem-âra Ber aks olup etdi çâhı me'vâ

1270 Kasd eyledi târem-i Simâke Bir başka sefer göründi hâke

> Gitdi niçe sâl ü mâh u eyyâm Ka'rın bulup etdi âhir ârâm

Bir dîve meger o çâh-ı mihnet Olmuşdı makâm-ı hâb u râhat

Bir dîv ki var niçe sipâhı Her birisi ma'den-i siyâhî

Mânend-i şeb-i firâk bed-rûy Kan teşnesi mürde fîl-i bed-bûy

1275 Dutdılar ol iki derd-mendi Takdılar ayağına kemendi

> Arz eylediler o dîv-i meste Kim sayd budur şikeste beste

Karşu çağırıp o dîv-i hâil Mihr oldı Zühal-le san mukâbil

Dedi ki ne râha eyleyip azm Düşdün bün-i çâha böyle bî-hazm

Duydum gam-ı Hüsn'e cân-feşânsın Zer tâlibisin esîri kânsın 1280 Lâkin bu ne fikr-i kec-nümâdır İdrâk degil başa belâdır

> Sen kanda ol âftâb kanda Deryâ kanda serâp kanda

Hoş kısmet imiş bize vücûdun Bağlandı basîret ü şühûdun

Kim vardı diyâr-ı kîmyâya Ankâya erişdi ya hümâya

Bî-fîkr ü süâl râha düşdün Evvel kademinde çâha düşdün

1285 Allah Allah zihî hamâkat Bu rütbe olur olursa gaflet

> Yazık sana acıdım cüvânsın Ammâ ki aceb ne bed-gümânsın

Şûrîden-i Aşk

Aşk âteş-i kîn ile olup germ Dedi ne gerek bu sözlerin nerm

Katl etme degil midir murâdın El-ân elinde zulm ü dâdın

Gûyâ ki bu sözle fikr-i cânân Gönlümden olur mı zerre pinhân

1290 Korkutmağa düşme bî-mahaldir 1290 Vuslat dediğim benim eceldir

> Salt bende degil bu fikr-i cânân Ölsem de giyâhım eyler efgân

Bu çâhda ney bitip serâser Uşşâka gam-ı firâk söyler

Gitmez bu hevâ dimâğımızdan Bu dûd çıkar ocağımızdan

Gam meş'alidir bu sönmek olmaz Cân vermek olur da dönmek olmaz

Habs Kerden-i Dîv Îşân Râ

1295 Ol dîv-i laîn-i bed-serencâm Habs etmege kıldı emr ü ikdâm

> Tâ eyleye şahm ü lahmın efzûn Sonra anı tu'me ede mel'ûn

Bir niçe zamanlar Aşk u Gayret Kaldı orada esîr-i mihnet

Birbirine tesliyet verirdi İkdâmda takviyet verirdi

Resîden-i Sühan

Bir subh Sühan yetişdi ol pîr Geldi ser-i çâha etdi takrîr

1300 K'ey beste-i çâh olan cüvânlar Hengâm-ı belâda mihrbânlar

> Azm eyleyiniz halâsa durman Yol korkuludur hulâsa durman

Bu çâhda hiç halâs yokdur Üftâdelere menâs yokdur

İllâ bün-i çehde bir resen var Cinnîler ana degil haber-dâr

Bir pîr ana tılısm yazmış Hıfz etmege hayli ism yazmış

1305 Kim ol reseni dutarsa muhkem Hıfz eyler anı o ism-i a'zem

> Cinler edemez ana hasâret Cıkdıkca bulur necât ü râhat

Efsûn ile söyledim bunı ben Cinnîler içinde söyleme sen Halâs Yâften-i Aşk u Gâyret

Emrini dutup o iki cân-bâz Mansûr olup oldılar ser-efrâz

Açdı gözin Aşk-ı âsmân-gîr Gördi ki Sühan'dır işte ol pîr

1310 Bildi ki diyâr-ı yârdandır Ol subh o nev-bahârdandır

> Bir hasret ü derd ile çekip Sordı bana söyle Hüsn'i billâh

Söyler mi beni nedir hayâli Gâhîce anar mı bî-mecâli

Âgâh mıdır melâlimizden Âyâ ki sorar mı hâlimizden

Yâdına gelir mi âşnâlar Makbûle geçer mi bu belâlar

1315 Düşdüm o hevesle ka'r-ı çâha Kim çehde karîn olam o mâha

> Duydum anı sonra kim gümândır Mâhın yeri evc-i âsmândır

Hâlâ o talebde şerm-sârım Geçdim yere lîk bî-karârım

Şâyân idi kalsam ol belâda Sen Hızr yetişdin ol arada

Şimdi bana yârdan haber ver Ol geçdi bu bârdan haber ver

1320 Bakmadı Sühan bu âh ü zâre Bir mürg olup uçdı bâğ-ı yâre Gayret dedi Aşk'a ey birâder Gel yol eri yolda olmak ister

Bâl açdı iki hümâ-yı rif'at Düşdi yola hemçü bûm-ı gurbet

Medd-i nigehi edip asâ-keş Gitdi iki merdüm-i belâ-keş

Üftâdelige gam oldı munzam Düşdi yolına harâbe-i Gam

1325 Ol râh ki zikri geçmiş idi Her gâmı megaak-i nâ-ümîdî

Der Sıfat-ı Şeb ve Şiddet-i Şitâ

Bir deşt-i siyehde oldı güm-râh Yeldâ-yı şitâ belâ-yı nâgâh

Bir deşt bu kim neûzü billâh Cinler cirid oynar anda her gâh

Birbirine ye's ü havf lâhık Geh kar yağar idi geh karanlık

Deycûr ile berf edince ülfet Bir kâlebe girdi nûr u zulmet

1330 Sermâdan olup füsürde mehtâb Şebnem yerine döküldi sîm-âb

> Âhû-yı sefîde döndi deycûr Sahrâ dolu müşg içinde kâfûr

Bir bakıma berf içinde deycûr Mânend-i sevâd-ı dîde mahsûr

Buzdan kırılıp sipihr-i mînâ Düşdi yere rîze rîze gûyâ

Bak bak felek-i siyâh-kâre Âyîne götürdi Zengibâr'e

1335 Sermâ ile berf olunca munsab Dendânı sırıtdı zengî-i şeb Bin mîh ile na'l-i mâhı encüm Deycûr-ı şitâdan eyledi güm

Mânend-i sitâre-i şeb-efrûz Gâhî görünürdi rûz-i fîrûz

Burc-ı esed oldı râh u meydân Her gûşede bir pamukdan arslan

Gûyâ dutulup zebân-ı şu'le Lerzende idi figân-ı şu'le

1340 Efsürde olup şirâr-ı ser-keş Gevherler içinde kaldı âteş

> Hammâmın olup şikeste câmı Elmasdan oldı tâk u bâmı

Perrende olup zülâl-i kühsâr Berf adı ile yağardı tekrâr

Sahrâdan edip girîze tasmîm Südlüce'de kaldı cedvel-i sîm

Kan etdi biribiri-yle ihvân Engüşt ile pençe şâh-ı mercân

1345 Dehşetle olup kar altı dünyâ Kühsâr ile sarsar oldı hem-pâ

> Kalmadı hevâda mürg-ı ser-keş Gâhîce uçardı seng-i âteş

Yâkût gibi habâb-ı sahbâ Hiç şu'leden eylemezdi pervâ

Âteşde zülâl edip tekevvün Dûd eyledi sarsara tahassun

Mâhîleri sayd için serâser Bağlı idi oltalarda ahker

1350 Sultân-ı dey etdi şehri tezyîn Düşdi leb-i bâma nây-ı sîmîn

> Yah-pâre olup zebân-ı gûyâ Geldi leb-i bâma harf-i şekvâ

Âteş-geh-i mihr olurdı berbâd Subh urmasa buzdan ana evtâd

Gabrâya ağardı sakf-ı hadrâ Dutmasa sütûn-ı yahla sermâ

Deryâları geşt edince gâhî Âhûya gıdâ olurdı mâhî

Olsaydı segin dehânı pür-cûş Âgûş-ı peder sanırdı hargûş

> Lağzişden edip meger taharrî Gelmezdi kenâr-ı havza perrî

Cemre eger olmasaydı lağzân Düşmezdi zemîne tâ hazîrân

Hep zâhire çıkdı meşreb-i halk Kalmaz leb-i bâmdan leb-i halk

Lerzîde nefesle sohbet-i nâs Zencîr-i cünûn velîk elmas

1360 Fânûsun içinde şem'i rahşân Deryâda nühüfte şâh-ı mercân

> Nesr-i felegi görüp kümesde Kesdi sesi fähte kafesde

Tâ olmaya dâne-çîn-i hirmân Güncişke şerer dökerdi sıbyân

Mirrîhin eli donup şitâdan Düşdi yere hançeri semâdan

Şîr-i felek oldı şîr-i berfîn Dendânı yerinde idi pervîn

1365 Mânend-i sitâre-i şeb-efrûz Gâhî görünürdi rûz-ı fîrûz

> Yah-beste olunca çeşm-i giryân Gözlükle arardı mergi merdân

Sûz-ı dile bulmağ için esbâb Germ-ülfet idi adû vü ahbâb

Baruta şitâb ederdi âhû Ağız otına gelirdi tîhû Mey-hârelik oldı zühde hem-ser Âb-ı huşk oldı âteş-i ter

1370 Agreb bu ki dondı râh-ı efkâr Sekte-yle gelirdi tab'a eş'âr

> Bi'lcümle sühan-verân hâmûş Hum-hâne-i ma'nî eylemez cûş

Gâlib bana olamazlar enbâz Ben şu'le-i fîkre eylerim nâz

Ser-gerdânî-i Aşk

Ol havf ü hatardan Aşk-ı âgâh Bin dehşet ü gamla oldı güm-râh

Bildi ki şehir degil ovadır Ammâ ya sihir ya kîmyâdır

1375 Esbâb-ı helâk hep mükerrer Âvâze-i ra'd ü berk u sarsar

> Deryâ-yı zalâm mevc-ber-mevc Gûlân-ı hayâl fevc-der-fevc

Bir yana belâ-yı vehm ü vahşet Bir yana hevâ-yı berf ü zulmet

Görmüş degil idi gam diyârın Nâzendesi idi rûzgârın

Gördi karalardan aşdı zulmet Etdi o cüvânı gark-ı dehşet

1380 Etdi niçe serserî tekâpû Mânende-i gird-bâd her sû

> Ol deştde iz belirmedi hiç Bir râh-ı necât görmedi hiç

Sıfat-ı Sihr-i Câdû

Nâgâh anı gördi ol perî-veş Hırmen gibi bir mahûf âteş

Katrân-ı cahîmden nişâne Üstinde zebâne-ber-zebâne

Eflâke resîde dûd-ı şu'le Sihr idi velî nümûd-ı şu'le

1385 Bir pîre-zen etmiş anda me'vâ Câdû-yı mahûf-ı dîv-sîmâ

Dûzahda makarrı sanki şeytân Dört yanı cahîm ü zift ü katrân

Başı Karadağ'dan nümû-dâr Ağzı dişi köhne gûr-ı güftâr

Burnı Modaburnı'nın ovası Zarbân yatağı keler yuvası

Sarkmış leb-i zîri tâ-be-zânû Mânende-i nâv-ı fîl-i bed-bû

1390 Kaplubağa iki çeşm-i bed-reng Kirpikleri hemçü pây-ı harçeng

> İki meme şekli iki hınzîr Bir kâr için etmiş anı ser-zîr

Kaş yapmış iki kara çiyanı Zülf etmiş iki küme yılanı

Tarla koğuğı iki kulağı Kirpi yuvası sıçan yatağı

Ağzından akar kerîh sular Kârîz gibi kötü kokular

1395 Burnında çiyan u mûş u akreb Ağzında zehirli hayye vü dabb

> Âteş ile söyleşir zebânı Gûyâ o cehenneme zebânî

Âlât-ı sihir yanında hâzır Bin köhne sifâl ü dühn-i vâfir

Bir dühni ki vaz' ede sifâle

Bâdî idi niçe bin hayâle

Geh ebre süvâr olurdı çün bâd Geh âteşe etdirirdi feryâd

1400 Evlâdı doğardı bir yanından Yutduğı çocukların kanından

Tu'me eder idi yine tekrâr Doğurduğun ol kerîh-i bed-kâr

Arzâ Kerden-i Câdû Hodrâ Ber Aşk

Sihr eyleyip etdi Aşk'ı da'vet Arz eyledi ana zîb ü zînet

Bin gûne kumaş ü kâle vü fer Elmas ile lâ'l ü cevher ü zer

Ol kâleleri geyindi fi'l-hâl Aşk'a dedi gel oğul beni al

1405 Akd eyle aman bu derd-mendi Gönlüm seni çâre yok begendi

> Etmek seni bu sipihre sultân Âsân görünür fakîre âsân

> Olursan eger bu kâre bîzâr Bir sihr ile hâlin eylerim zâr

Izdırâb-ı Hâl-i Aşk

Aşk ol sözi anlayıp işitdi Geh ağladı geh taaccüb etdi

Kaldırdı başını âsmâna Dânende-i râz-ı ins ü câna

1410 Âhına siper kılıp sipihri Yâd eyledi Hüsn-i mihr-çihri

> Ey Hüsn ey âftâb-ı enver Ey Aşk'ı eden esîr-i ahker

Bu muydı ümîd senden ey mâh Câdû ola vaslıma hevâ-hâh

Ben kürbet-i gurbet içre bî-tâb 1412 Sen zevk u safâdasın ferah-yâb

Ben berf-ı zalâm içinde güm-râh Olsun sana bu felek hevâ-hâh

1415 Lâkin bu mı şîve-i mahabbet İnsâf kıl ey meh-i semâhat

> Yâri olanın esîr-i ahker Geçmez boğazından âb-ı Kevser

Geh baht gehî sipihr ü geh yâr Göz yaşını kıldı germ-i bâzâr

Âvîhten-i Câdû Aşk Râ

Câdû anı gördi bu belâda Ye's eyledi hışmını ziyâde

Bir sihr ile çekdi çârmîha Hem kıldı nişâne tîğ ü sîha

1420 Ol âteşe karşu Aşk u Gayret Salb oldı ki ala bundan ibret

Nemrûdluk eyleyip kemâhî Salb eyledi sihr ile o şâhı

Çün görmüş idi çeh-i amîkı Seyr etdi bu yolda mancınıkı

Kandîl gibi o gonca-i ter Asılma fürûğın etdi ber-ter

Çünkim sever idi Aşk'ı Câdû Tahvîfini kasd eder fakat bu

1425 Aldı boğazını vehm-nâkî İncinmedi hiç cân-ı pâki

> Ol dârda çün hatîb-i minber Kaldı niçe hafta ol semen-ber

Eylerdi hezâr-gûne efgân Sanırdı gören hezâr-ı nâlân

Gâh etdi sipihre arz-ı bî-dâd Gâh eyledi Hüsn'e âh u feryâd

Gâh eyledi bahtına hitâbı Tîz eyledi nâvek-i itâbı

1430 Ey baht nedir bu bî-vefâlık Hiç yok mı seninle âşnâlık

> Cânân dutalım ki bî-vefâdır Hem âdetidir ve hem sezâdır

Âşıkda gam u belâ gerekdir Dildâr ise bî-vefâ gerekdir

Sen bâri o şîve-kâre uyma Gel şîve-i rûzgâre uyma

Ne anda ne bunda buldı te'sîr Fehm etdi ki cümle kâr-ı takdîr

1435 Geldi yine başına şuûrı Yâd eyledi rahmet-i Gafûr'ı

> Ey hâlik-i ins ü cân rahm et Yok bende tüvân amân rahm et

Takdîr yok ise vasl-ı yâre Al cânımı ver o şîve-kâre

Bin fikr ile söylenip perîşân Ma'bûdına kıldı âh u efgân

Resîden-i Sühan

Ol demde Sühan huzûra geldi Kün emri gibi zuhûra geldi

1440 Ol ân açıldı şâm-ı zulmet Zevka bedel oldı havf u dehşet

> Hak zâhir olup bozuldı evhâm Sihr oldı hebâ misâl-i ahlâm

Gördükde o pîri Aşk-ı çâlâk Giryân olup etdi sînesin çâk

Hüsn'i anıp etdi âh u feryâd Hem kıldı bu şi'r-i pâki inşâd

Tardiyye

1

Hoş geldin eyâ berîd-i cânân Bahş et bana bir nüvîd-i cânân Cân ola fedâ-yı îd-i cânân Bî-sûd ola mı ümîd-i cânân Yârin bize bir selâmı yok mı

2

Ey Hızr-ı fütâdegân söyle Bu sırrı edip ıyân söyle Ol sen bana tercemân söyle Ketm etme yegân yegân söyle Gam defterinin temâmı yok mı

3

Yâ Rabbi ne intizârdır bu Geçmez niçe rûzgârdır bu Hep gussa vü hârhârdır bu Duysam ki ne şîve-kârdır bu Vuslat gibi bir merâmı yok mı

4

Çıkdım ser-i dâra hemçü Mansûr Âvâzım ezân-ı nefha-i Sûr Gam kıldı gülûmı şâh mansûr¹ Oldum sipeh-i belâya mahsûr Ol pâdşehin peyâmı yok mı Kâm aldı bu çarhdan gedâlar Ferdâlara kaldı âşnâlar Durmaz mı o ahdler vefâlar Geçmez mi bu etdigim duâlar Hâl-i dilin intizâmı yok mı

6

Dil hayret-i gamla lâl kaldı Gâlib gibi bî-mecâl kaldı Gönderdigim arz-ı hâl kaldı El ân bir ihtimâl kaldı İnsâfın o yerde nâmı yok mı

Müjde Dâden-i Sühan

Bâz etdi Sühan der-i hitâbı Bu tarz ile verdi kim cevâbı

1445 Sen yârini bî-haber mi sandın Yoksa seni terk eder mi sandın

> Ol şâh-ı diyâr-ı hüsn ü ândır Feryâd-res-i fütâdegândır

Âşıkdır o sana sanma ma'şûk Gûş et ki budur kelâm-ı mevsûk

Gör kudret-i Hüsn-i bî-misâli Ol sâhirenin nic'oldı hâli

Şimdi gözün aç da eyle dikkat Câdûya bak al bu sırdan ibret

1450 Bir yol bakıp Aşk-ı âlem-ârâ Câdûya nigâh kıldı ammâ

> Ne gördi bir özge hâle girmiş İt lâşesi bir çuvala girmiş

Ne zîneti var ne zîb ü zîver Hınzîr ölüsi füsürde kâfer Bir tîğ urulup dü-pâre olmuş Bed-kâr idi bed-sitâre olmus

Yanında ne âteş ü ne zulmet Ne berf ü ne çârmîh ü dehşet

1455 Etdi Sühan ol hayâli tasvîr Kıldı sebebin bu gûne takrîr

> Sen Hüsn adın eyledin ferâmûş Câdû seni kıldı böyle medhûş

Hüsn adı tılısmıdır bu sihrin Neshi anın ismidir bu sihrin

Çün eyledin ana arz-ı hâcet Oldı olan işte kıldı himmet

Feryâdına yetdi Hüsn-i yektâ Bir tîğ-i mücevher etdi ihdâ

Der Vasf-ı Tîğ

1460 Amma ki ne tîğ tîğ-i elmas Cellâd-ı adû şihâb-ı vesvâs

> Yek mısra-ı Zülfekâr-ı Hayder Bir âyet-i kâr-zâr-ı Hayder

Âyîne-i nusret-i ilâhî Hızr-ı reh-i resm-i pâdşâhî

Reşk-âver-i tîğ-i çeşm ü ebrû Hâmûş-kün-i şâir-i hecâ-gû

Kan ırmağı cûybâr-ı âteş Zehr-i ecel ejder-i münakkaş

Mâh-ı nev ana niyâm-ı garrâ Başdan başa cevheri Süreyyâ

> Mânende-i mevc-i âb-ı hayvân Elmâs velî fesânı mercân

Bir tîğ ki bahr-ı bî-kerâne Su yerine cân eder revâne Ser-pençe-i âftâb-ı rûşen Çekmiş anı beyza-i kamerden

Çün gamze-i dilberân-ı tannâz Âşûb-ı kazâya harf-endâz

1470 Gerdûn-ı vegâ vü ceng mâhı Girdâb-ı belâda tîğ-i mâhî

> Bâr u beri şu'le şâh-ı âteş Endâmı pür-âteş ü müzerkeş

Fevvâre-i âb-ı lâ'l-i sîr-âb Cûbâr-ı zümürrüd-i siyeh-tâb

Bir tûtî-i sebz-i hûn-pâlâ Şehbâz velî tezerv-sîmâ

Azrâil işâretine münkâd Bâl ü per mevci mahşer-îcâd

1475Çekmiş anı vâye-bahş-ı ma'den Mürg-i melekût beyzasından

> Be'sinde safâ-yı hıfz meşhûd Mevc-i güher anda zırh-ı Dâvûd

Bir kara haberci mürg-ı ahder Bâlinde nühüfte mevt-i ahmer

Hûn-hâr velîk zulmi dâfi' Kec-bahslere cevâb-ı kâtı'

Dâvâne senin güvâhdır bu Kec bakma ki tîğ-i âhdır bu

1480Her nesne ki sedd ola bu râha Kıl anı havâle tîğ-i âha

Der Vasf-ı Esb

Hem bir dahi bir semend-i dil-keş Etdi sana tuhfe ol perî-veş

Süğlün gibi bir semend-i gül-gûn Gül-zâr-ı behişt ü kulzüm-i hûn Mevc-âver-i âb-ı lâl ü yâkût Refref gibi râh-vâr-ı lâhût

Ser-tâ-be-kadem bahâr-ı gül-pûş Sahbâ gibi lâl-reng ü pür-cûş

1485 Sîm-âb velîk şu'le-peyker Hurşîd-veş âteş-i musavver

> Endâmı hamîre-i nezâket Her cünbişi cilve-i kıyâmet

> Tûbâ-yı cinân dıraht-ı şu'le Kâşâne-i adn ü taht-ı şu'le

Hûn-ı dil-i âşıkâna benzer Hızr âbı velîk kana benzer

Tâvûs-ı behişt ü şîr-i garrâ Al câmeli bir arûs-ı zîbâ

1490 Tîz eylese şîve-i hırâmın Verir ezele ebed peyâmın

> Reftârını eylese müsâid Gerdine erişmez ân-ı vâhid

Bir rütbededir ki zûd-reftâr Eczâ-yı hevâya vermez âzâr

Çün tayy-ı mekâna himmet eyler Eczâ-yı zemâne sebkat eyler

Şîrîn-harekât ü Rüstem-ârâm Reşk-âver-i abraş-ı gül-endâm

1495 Ârâma ayak direrse gâhî Kara taş eder yem-i siyâhı

> Dağ gibi durur o şu'le-endâm Çün künbed-i lâ'l-reng-i Behrâm

İki kulağı çeleng-i şehbâz Gerdânı sürâhî-i ser-efrâz

Hayvân velîk âb-ı hayvân Çün subh-ı bahâr nahl-i mercân Her mûyı tarabda târ-ı tanbûr Âvâz-ı sahîli nefha-i Sûr

1500 Süm kâse-i mağz-ı dîv-i esfîd Düm târ-ı şuâ-ı nûr-ı hurşîd

> Su gibi akar zemîn ü kâna Âteş gibi sıçrar âsmâna

Âhû gözi sînesi gazenfer Sünbül saçı dem misâl-i ejder

Ankâ-yı sühan-şinâs-ı hoş-dem Pervâzda şu'le-i mutalsam

Dil-dâr u dil-âver ü küşâde Çün neş'e-i şîr-gîr-i bâde

1505 Gül-gûne-i hûn-ı eşke hem-reng Kânûn-ı mahabbete hem-âheng

> Tûtî gibi gerçi âl-câme Hâmûş-kün-i kümeyt-i hâme

Velhâsıl o Aşkar-ı sebük-bâl Eyler seni şehr-i Kalb'e îsâl

Hüsn'ün sana yâdgârıdır bu Cehd eyle ki Gam diyârıdır bu

Hem Gayret'e perr ü bâl verdi Hem-rehligine mecâl verdi

1510 Gördün mi ne pâdşâhdır ol Kim Aşk'a delîl-i râhdır ol

> Dersen ki cenâb-ı Hüsn-i yektâ Bu kudreti kanda kıldı peydâ

Bir bende-i şerm-sârıyım ben Fehm eyle ki hâk-sârıyım ben

Emr eyler ise eger o dâver Lâ şey gibidir bana bu şeyler

Melâlet Kerden-i Aşk Ez Belâ-yı Dûrî

Bindikde cenâb-ı Aşk o esbe Azm eyledi râhına dü-esbe

1515 Gayret dahi açdı perr ü bâlin Yâd etdiler ol şehin visâlin

> Ammâ katı pek girân gelirdi Gâhî düşünüp usan gelirdi

Yârı bırakıp da râha gitmek Mâhı bırakıp da çâha gitmek

Günden güne nâ-ümîd olurdı Fersah fersah baîd olurdı

Gayret der idi kesilmez ümmîd Lûtf-ı Samed'e olur mu teb'îd

1520 Maksûda ere geri gidenler Gevher bula serserî gidenler

> Ma'lûm ki Hakk'a ard ön olmaz Yokdur ciheti ana yön olmaz

Gündüz gece edelim şitâbı Bir gün görürüz o âftâbı

Seyr eyler idi o bedr-i kâmil Her gece hezâr-sâle menzil

Tayy-eyler idi o mihr-i enver Her rûz dokuz felek kadar yer

1525 Hurşîde süvâr olup çü Îsâ Etmezdi seyâhatı mûbâlâ

> Gâhî ki düşerdi havf-ı câna Gayret der idi o bî-amâna

Fürkat gibi mevt ömre sürmez Allah ne verir ki kul götürmez

Ceng-i Aşk Bâ Vuhûş u Dîv ü Gûl

Vakta ki cenâb-ı Aşk-ı bî-bâk Gam deştine düşdi ârzû-nâk Ol tîğ ile Aşk-ı berk-cevlân Gam deştini etdi rîk-i meydân

1530Her gûl-i belâ ki çıkdı râha Kıldı anı tu'me tîğ-i âha

> Döndürdi zemîni âsmâna Ejderleri reng-i kehkeşâna

Etdi ser-i dîv ü gûli sergi Verdi o sipâha nakd-i mergi

Hûn-âbe-i şîri etdi deryâ Kaplan derisine döndi sahrâ

Bir seyf ile etdi ol melek-zâd Deycûr-ı cahîmi cennet-âbâd

1535 Az vaktde geçdi Gam harâbın Hem sihrini gördi hem serâbın

> Geçdi o yolı ecelden akdem Kaldı geride sarây-ı mâtem

Hitâb-ı Sâkî

Sâkî getir âteş-i sabûhı Nûr eyle o âteş ile rûhı

Düşsün dile şûr-ı çeşm-i giryân Mevc ura tenûr içinde tûfan

Yangın yerine dönüp bu sîne Mey gark ede lîk şu'lesine

1540Dil-beste-i sâz-ı erganûnuz Hem silsile-bend-i mevc-i hûnuz

> Zencîrimiz edemez küşâde İllâ ki hüsâm-ı mevc-i bâde

Bir hışm ile ver ki ol şerâbı Mirrîh-i belâ ola habâbı

Başdan çıkarıp o câm-ı gül-reng Mansûr'a ede bizi hem-âheng Nîk ü bedi edelim ferâmûş Cân ile helâk ola hem-âgûş

1545Kannâre imiş harâbe-i Gam Kanı hat-ı câm o hizb-i a'zem

> Dutmuş yolı çünki hâr ü hâşâk Ol seyl-i şirâre eylesin pâk

Gam deştine eylerim tekâpû Kimdir dura şimdi bana karşu

Gelsin berî sedd-i râh olanlar Hasret-keş-i tîğ-i âh olanlar

Resîden-i Râh-ı Û Be Deryâ-yı Âteş

Gûş etmiş idi o ser-güzeşti Âteş yemi üzre mûm keştî

1550 Çıkdı yolı üzre şimdi nâgâh Ol kulzüm-i âteş-i ciger-gâh

> Mûmdan gemiler edip hüveydâ Kılmış niçe dîv o bahri me'vâ

Çün âteş o kavme etmez âzâr Âzürde olur mı nârdan nâr

Keştîleri ber hevâ dutarlar Çok ebleh-i bî-nevâ dutarlar

Keştîye kim eyler ise ikdâm Ol dîvler eyler idi i'dâm

1555 Keştî velî nahl-i sûra benzer Kâlibedi sürh şu'le-peyker

> Gûyâ ki cezîre-i felâket Pür-sûz-ı belâ kızıl kıyâmet

Her biri misâl-i kûh-ı Sürhâb Dopdolı içinde dîv-i küh-râb

Tâbût idi san o keştî-i mûm Olmaz girenin mezârı ma'lûm Ol fülk ü o nâr-ı pür-felâket Hep şem'-i mezârdan ibâret

Ol sihre mahall idi fakat nâr Hiç sâhile edemezdi âzâr

> Çün dîvler etdi Aşk'ı da'vet Gel keştîye bulasın selâmet

Aşk eyledi mâcerâyı iz'ân Sabr eyleyip olmadı şitâbân

Ammâ ki ne çâre râh mesdûd Hiç olmadı bir tarîk meşhûd

Hasb-i Hâl

Ey Hâlık u Kird-gâr tâ key Bu mihnet ü hâr hâr tâ key

1565Reh-zen ne revâ ki yol senindir Ger hâhiş edersen ol senindir

> Lâzım mı her ehl-i derd-i pür-şûr Çıkmak ser-i dâra hemçü Mansûr

Etme beni fürkate nişâna Bed-ahdi ne hâcet imtihâna

Çün zerre-i aşka mazhar etdin Hurşîde başım berâber etdin

Câdûlar elinde etme beste Öldür beni koyma böyle haste

1570 Ol mevt hayât-ı câvidândır Ger nefs için istene ziyândır

> Maksûd hemîn rızâ gerekdir Ol kasde dahi atâ gerekdir

> Râh-ı talebinde beste-pâyım Sen eyle küşâde bî-nevâyım

Makbûle sezâ bir ilticâ ver Hem eyle kabûl hem duâ ver Gönlümde taleb inâyet eyle Hâhişde edeb inâyet eyle

1575 Bir lûtfa karîn ola bu matlap Küstâhlığım kemâl ola hep

> Ger dâr ise kenc-i mahfilimdir Ol nâr ise nâr-ı menzilimdir

Çün bahr-ı inâyet eyleye cûş Hâşâ ola bendeler ferâmûş

Bu gam bilirim ki âha degmez Billâh ki bir nigâha degmez

Ammâ ki ümîd rahmetindir Me'lûf olunan inâyetindir

1580 Sahrâ-yı ademde eyledin cûd Verdin yok iken libâs-ı mevcûd

> El ân ademdeyiz adîmiz Hâhiş-ger-i ni'met-i amîmiz

Güft ü Gûy-ı Aşk u Aşkar Ve Güzeşten-i Îşân

Kaldı orada esîr-i Hayret Ne tâb-ı güzer ne fikr-i avdet

Nutka gelip Aşkar-ı gül-endâm Dedi ne sebebden etdin ârâm

Aşk eyledi dürr-i eşki rîzân Söz söyledi hemçü dürr-i galtân

1585 Gayret gibi yok per ile bâlim Bu âteş ile nic'ola hâlim

> Şâhin degilim ki edip âheng Pervâz edeyim hezâr ferseng

Aşkar süzülüp misâl-i ankâ Ol âteşe girdi bî-muhâba

Sıfat-ı Ân Âteş

Bir nâr ki dûdı dûd-ı Nemrûd Gûlân-ı siyeh-nümûd-ı Nemrûd

Dünyâları dutmuş âteş-i gam Girdâbları çeh-i cehennem

1590 Dûzah velî şu'le-zâr-ı sîm-âb Her ahkeri cür'a-nûş-ı girdâb

> Her gavtası bir muhît-i âteş Her lüccesi bir cahîm-i ser-keş

> Hûn-âb-ı ciger-misâl-i gül-gûn Deryâ-yı şirâre kulzüm-i hûn

Tûfân-ı şirâre mevc-ber-mevc Pervâzda Aşkar evc-ber-evc

Pür-cûş-ı belâ muhît-i âteş Şu'le ana ol semend-i ser-keş

1595 Nûr etdi cemâl-i Aşk'ı teşdîd Hûn-âb-ı şafakda sanki hurşîd

> Gayret dedi Aşk'a yakma cânın Bu âteşidir o kîmyânın

Mânend-i ukâb eyle pervâz Ol pûta-i imtihânda mümtâz

Sanma ki bu kapudan gelirsin Âteşde gider sudan gelirsin

Bu nâr-ı fenâdan olma ferrâr Batn-ı feres içre girme tekrâr

1600 Dûd içre kalıp o mihr-i rûşen Bir fîtne idi hüsûf-ı mehden

> Bâl açmış anın yanında Gayret Pervâne velîk şîr-sûret

Gûlânı ederdi hem demâdem Bir tîğ ile cân-ber-cehennem

Çün âyet-i *berd* âh-ı serdi Ol âteşi dûd-veş geçerdi Altında semendi çün semender Gayret de yanınca bes berâber

1605 Velhâsıl o âteşîn râhı Geçdi çü nesîm-i subh-gâhî

Resîden-i Aşk Be Sâhil-i Çîn

Bir sâhile erdi kim güzârı Firdevs riyâzının bahârı

Bülbülleri tûtî-i sühan-sâz Bebgâları sûz ü sâza hem-râz

Deryâ gibi sebze mevc-engîz Tûbâ gibi her nihâl-i gül-bîz

Tûfân-ı çemen yem-i zümürrüd Yer gök yeşil âlem-i zümürrüd

1610 Her sûda şükûfeler nümâyân Pür-hande misâl-i mâh-rûyân

> Her goncası bir bahâr-ı hurrem Her şebnemi bir sehâb-ı pür-nem

Gerdûn-veş o bûstân-ı enver Ay çiçeği âftâba benzer

Sahrâ dolu nergis ü karanfül Bîgâne giyâhı verd ü sünbül

Bir rütbe hevâsı sâf ü dil-cû Bülbülleri gonca gibi hoş-bû

1615 Zerrât-ı şemis olup küşâde Sâat çiçeği-ydi hasb-i âde

> Putrak diken açılıp çemende Çarh-ı felege ederdi hande

Seyr eyleyip Aşk o bâğ u râğı Bir âh ile tâzelendi dâğı

Nüzhet-geh-i Ma'nî'yi edip yâd Bu şi'r-i nevîni kıldı inşâd

Tardiyye

Ι

Ey hoş o zaman ki dil olup şâd Cân mülki idi meserret-âbâd Etdim o hevâları yine yâd Allah için eyle ey felek dâd Ârâyiş-i rûzgâr idim ben

II

Bir bâğ idi kim bu câna me'vâ Her goncası cennet idi gûyâ Fürkat gelip etdi cümle yağmâ Gönlümde o neş'e kaldı hâlâ Mest-i mey-i i'tibâr idim ben

III

Hiç yokdı sipihre bir niyâzım Der-kâr idi ayş ü nûş ü sâzım Yanımca gezerdi serv-i nâzım Açılmamış idi böyle râzım Reşk-âver-i nevbahâr idim ben

IV

Şimdi gam-ı intizâra düşdüm Bülbül gibi nev-bahâra düşdüm Çün nârı geçip kenâra düşdüm Sâgar gibi pâre pâre düşdüm Mey-nûş-i itâb-ı yâr idim ben

V

Ey vâh o rûzgâr geçdi Gül geçdi vü nevbahâr geçdi Dîdâr güm oldı dâr geçdi Cân teşne kalıp humâr geçdi Ma'şûk ile bâde-hâr idim ben VI

Cânân ile ayş ü nûş ederdim Girdâb gibi hurûş ederdim Bezm-i meyi şu'le-pûş ederdim Bülbüllerini hâmûş ederdim Gâlib gibi kâm-kâr idim ben

Âgâhî Dâden-i Sühan Be Sûret-i Tûtî

Bu şi'r-i teri okurken ol mâh Bir savt-ı garîb işitdi nâgâh

1620 Bir tûtî-i sebz-i âl-minkâr Bir şâhda eyler anı tekrâr

> Kim duhter-i şâh-ı Çin o hûn-rîz Bu bâğa gelir çü subh-ı gül-bîz

Ol duhterin adı Hüşrübâ'dır Âdem-küşdür perî-likâdır

Yazık sana ey cüvân yazık Olursun o şîve-kâre âşık

Zâtü's-suver'e varırsın elbet Eyler seni mübtelâ-yı mihnet

1625 Aşk ana bakıp gurûra geldi Esrâr-ı hafî zuhûra geldi

> Hüsn adın anıp dedi ki heyhât Ağyâre mahabbet edem isbât

Ol tûtî-i sebz edip bunı fâş Hızr-ı reh-i gayba oldı yoldâş

İbtilâ-yı Aşk Be Duhter-i Hüşrübâ

Vaktâ ki ne gördi Aşk-ı pür-şûr Ol bâğa erişdi bir bölük hûr Bir mâh ile bir gürûh-ı dil-ber Seyyâreler içre mihr-i enver

1630 Çün cünd-i ferişte cümlesi pâk Mânend-i sipâh-ı akl-ı derrâk

> Ol mâh ki ol gürûha şeh-di Ol cünd-i perîye pâdşeh-di

Bir hûr-nigâh-ı rûh-manzer Ayni-yle cenâb-ı Hüsn'e benzer

Gülzâr-ı izârı cennet-âbâd Şemşîr-i nigâhı fürkat-îcâd

Kaş besmele-i kitâb-ı rahmet Leb sûre-i Kevser'e işâret

1635 Ruhsâre-i âl câm-ı rahşân Ruhsâre-i mihre cür'a-efşân

> Sîmîn teni bir büt-i semen-sâ Hâmûş idi lîk sûret-âsâ

Îmâ ile söyleşirdi her gâh Yokdı deheni ne yapsın ol mâh

Nutk eylemez idi hiç o kâfer Gamze idi tercemânı yekser

Ve'lhâsıl o mihr-i âlem-ârâ Yekpâre cenâb-ı Hüsn-i zîbâ

1640 Ancak o kadar ki ol sühan-gû Hâmûş idi bu gül-i semen-bû

> Bin nâz ile etdi arz-ı dîdâr Aşk oldı hemen çü nakş-ı dîvâr

Âyâ ki Hüs(ü)n müdür bu meh-veş Kim sînemi kıldı genc-i âteş

Yoksa bu yerin perîsidir bu Yanında perî çerisidir bu

Aşk eyler iken bu fikri tekrâr Ser-rişteyi etmemişken izhâr

1645 Bir taht getirdiler mücevher Koydı o gürûh-ı nûr-peyker

Ol mâh-veş oldı ânda câlis Mihr oldı ya havz-ı nûra âkis

Etrâfa edip nigâh-ı dikkat Emr eyleyip Aşk'ı kıldı da'vet

Fi'lhâl getirdiler huzûra Gark oldı hemîn nûr nûra

Bir meclis-i ayş edip müheyyâ Bin gûne meserret oldı icrâ

1650 Aşk'a niçe ihtirâm kıldı Yanında ana makâm kıldı

Meclis-i Îş

Fi'lhâl getirdiler sabûhı Mezc etdi o mâh râha rûhı

Zer hânçesi âftâb-ı rahşân Sâgarları encüm-i dırahşân

Âgûş-ı arîş içinde ol şâh Âgûşına aldı Aşk'ı çün mâh

Sahbâ vü piyâle cûş-ber-cûş Kıldı meh ü hâle nûş-ber-nûş

1655 Mey kırmızı-i şafak-la hem-reng Müstehzî-i mâh câm-ı gül-reng

> Seyyâl velî nihâd-ı lâ'li Fasl-ı hikeme midâd-ı lâ'lî

Pür-zevk idi tab'-ı şu'le-zâdı Her cür'ası bin hulûsa bâdî

Sahbâ velî sâf hûn-ı tâvûs Keyfinde hezâr reng mahsûs

Kıldıkda usûl nağme-i sâz Hânendesi mest-i şu'le-âvâz

1660 Sâkînin elinde sâgar-ı nûr Güller bitirirdi şâh-ı billûr Sâkî dahi kendi ol perî-veş Bir hûr idi kim şerâbı âteş

Bir havz idi hançe-i mey-i nâb Nergis leb-i havza câm-ı zer-tâb

Leb-ber-leb idi sebû vü sâgar Yek-sân idi rinde hâk ü gevher

Bâzâr-ı bezimde vardı revnak Boş gitse dolu gelirdi zevrak

1665 Şükr etdi görüp sebû o hâli Hiç secdeden olmaz oldı hâlî

> Mevc urup o âteşîn sahbâ Zevrakla üzerdi hemçü deryâ

Mehtâbda meh mih içre mehtâb Mey şîşede şîşe meyde gark-âb

Çün kulzüm-i âteş oldı seyrân Tûfân-ı şerâbı gördi cûşân

Yâkût gibi şerâb-ı engûr Elmâs gibi piyâle-i nûr

1670 Sâkî siteme edince âheng Mey olur idi arakla hem-reng

> Perrende olurdı reng-i sahbâ Bülbüllük ederdi câme gûyâ

Şermende edince ol semen-ber Olurdı arak şerâb-ı ahmer

Bir demde ederdi ol perî-zâd Peymâne-i şîri hûn-ı Ferhâd

Dest-i nigehinde câm-ı rahşân Azrâil elinde cevher-i cân

1675 Bin câm içirirdi her nigâhı Gözden geçirirdi tîğ-i âhı

> Ol keyf ile kıldı Aşk tedbîr Dedi ki nazardadır o şemşîr

Serencâm-ı Aşk

Ol tîği alıp o subh-ı gül-gûn Gitdi koyup Aşk'ı zâr ü dil-hûn

Ol bâğa ki bakdı Aşk-ı pür-şûr Ne cünd-i perî göründi ne hûr

Ne mâh u ne ol gürûh-ı ahter Ne şâh u ne kürsî-i mücevher

1680 Dil düşdi henûz pîç ü tâba Uğradı hezâr ızdırâba

> Fürkat meger ol visâl imiş hayf Uşşâka safâ muhâl imiş hayf

Âğâze netîce verdi encâm Oldı gecenin sabâhı akşâm

Çün Aşk o şûhı Hüsn sandı Sîmâsına aldanıp inandı

Yol korkulu tîğ-i âh nâ-bûd Terk etdi bunı nigâr-ı ma'hûd

1685 Ne tâb-ı sefer ne tâb-ı gurbet Kaldı o belâda Aşk u Gayret

> Gördükçe o bâğ-ı pür-şürûrı Dağlardı dilin belâ-yı dûrî

> Ol sûrete oldı deng ü hayrân Hüsn'i sanıp eyler idi efgân

Âgâhî Dâden-i Sühan Be Sûret-i Tezerv

Gûş etdi ki bir tezerv-i dil-keş Bu gûne verir peyâm-ı âteş

Kim duhter-i şâh-ı Çîn'dir ol Hüsn anlama nakş-ı kîndir ol

1690 Bu bâğa gelirse yarın ol mâh

Zâtü's-suver'e alır seni âh

Aşk aklını başına edip cem' Bî-sûd idi lîk yandı çün şem'

Kaldı o gül-i harîm-i vuslat 1492 Ol bâğda hemçü bûm-ı gurbet

Fi'l-vâki' o duhter-i semen-sâ Ol bâğı yine edindi me'vâ

Etrâfa edip yine nigâhı Aşk'a nazar eyledi kemâhî

1695 Ol bâde-i sâfdan edip nûş Deryâ-yı mahabbet eyledi cûş

> Bir hâl ile Aşk'a edip îmâ Aldı yanına getirdi hem-pâ

Zâtü's-suver'e olup revâne Düşdi yola ol şeh-i yegâne

Men' Kerden-i Gayret ve Cevâb-ı Aşk

Çün Aşkar'ına binip o âfet Kasd eyledi râha dutdı Gayret

Dedi ki cenâb-ı Aşk'a eyvâh Olursun anınla gitme güm-râh

1700 Duydun ne dedi tezerv-i tûtî Vermem sana bu kadar sukûtı

> Aşk ana dedi ki ey birâder Gördün mi o şâh Hüsn'e benzer

Min vech çü yâre âşnâdır Öldürse eger beni revâdır

Evvelde rızâ degil mi maksûd Sen olma mısın bu kâre hosnûd

Gayret olup ahdine vefâ-dâr Ol güm-rehe uydı çâr u nâ-çâr

Der Sıfat-ı Kal'a-i Zâtü's-suver

1705 Çün Aşk ile Gayret ol semen-ber Ol kal'aya vardılar berâber

> Ne gördi ki bir garîb kal'a Her yanı suver acîb kal'a

Bir bâbdan oldılar çü dâhil Fi'lhâl kapandı oldı zâil

Hem dahi nihân olup ol âfet Habs oldılar anda Aşk u Gayret

Bir kal'a ki Sûmenât'a benzer Her seng-i siyâhı Lât'a benzer

1710 Hem-reng-i künişt çârsûsı Bir şehr-i azîm yok kapusı

> Hep kûçe vü kûyı Yûsuf-istân Dîvârlarında nakşı hûbân

Nakşı felekü'l-burûca hem-tâ Hem-hâlet-i hücre-i Züleyhâ

Gûyâ ki o kûh-ı Bîsütûn'dur Şîrînleri mâh-ı lâle-gûndur

Her kubbesi dest-kâr-ı Ferhâd Her sengi velî mezâr-ı Ferhâd

1715 Neyreng-i hayâlden ibâret Her sûreti bâc-ı şehr-i sûret

> Mermerleri hurde-kâr-ı bî-reng Dîvârı suver-nümâ-yı Erjeng

Fânûs-ı hayâl her menâre Bir tuhfe-i nev-di rûzgâra

Hep andaki hurde-kâr sûret Bârîk idi çün hayâl-i Şevket

Mehcûr idi sûrete heyûlâ Müstakbili nîm ruhla yektâ 1720 Olmuş meger anda çihre-perdâz Ol duhter-i şâh-ı Çîn-i tannâz

> Mânend-i tasavvurât-ı âşık Neyrengi vukûa nâ-muvâfik

Etmiş bu nukûşa ol sitem-hû Müjgân-ı perîyi hâme-i mû

Mânî'ye olunca haclet-îcâd Şencefri olurdı mağz-ı Bihzâd

Velhâsıl o mihr-i hâver-i Çîn Ol kal'ayı eylemişdi tezyîn

1725 Her sûrete Aşk kıldı dikkat Hüsn'i anıp etdi âh-ı fürkat

Ser-geştegî-i Aşk Der An Kal'a

Gayret dedi Aşkar'a süvâr ol Bu kal'ada kalma râh-vâr ol

Çün Aşkar'a bindi Aşk-ı yektâ Hâk-i rehin etdi âsmân-sâ

Tayy etmege başladı o râhı Bir ânda reh-i hezâr-mâhı

Çün mağribe mihr olurdı vâsıl Kat' edememiş dü gâme menzil

1730 Zâtü's-suver içre yine mahbûs Hâline bakıp olurdı me'yûs

> Her nesne ki geçmiş idi evvel Bu kal'ada geçdi hep mufassal

Bir çâha düşüp yine kemâkân Duttdular anı sipâh-ı gûlân

Kat' eyledi deşt-i berf-nâki Gördi o musîbet-i helâki

Câdû ile eyleyip keşâkeş Geldi yolı üzre bahr-i âteş 1735 Dahi niçe dürli hevl-i cân-kâh Yıllarca enîn ü nâle vü âh

> Bin havf ile geçdi Aşk o râhı Çün yokdı elinde tîğ-i âhı

Nâgâh açıldı râh-ı ma'nâ Bakdı anı gördi Aşk-ı yektâ

Menzil yine menzil-i mukaddem Ol sûret o kal'a-i mutalsam

Ma'bûdına eyleyip şikâyet Hâl-i dilin eyleyip hikâyet

Niyâz Kerden-i Aşk Bâ Hudâ

1740 Yâ Rab sen o şûha merhamet ver Ben hasteyim ana âfiyet ver

> Bu jâleden et o mâhı hoşnûd Çün senden olur husûl maksûd

Hiç hâlimi etmez oldı pürsiş Kim sûrete eyledik perestiş

Bîçâre idim alîmsin sen Ben yokdum o dem kadîmsin sen

Ol cürmi kabûl emr-i müşkil İsnâd-ı zulüm ana ne kâbil

1745 Gel kılma mecâzıma mücâzât Kim bu söz içindir istiârât

> Hâşâ ki sana berâber olmak Sen dîger o mâh dîger olmak

Çün oldum esîr-i çarh-ı telvîn Mümkin mi sözümde ola temkîn

Zencîr takıp bu büt-pereste Abdiyyete çek şikeste-beste

Maksûdumı cümle hâsıl eyle Maksûd-ı kadîme vâsıl eyle 1750 Çeksin beni sîneye o dilber Zevk u gamı ile şîr ü şekker

Kıl râst velî muhâldir bu Heyhât ki bir hayâldir bu

Senden taleb-i muhâl hakdır Her matlaba ihtimâl hakdır

Hâşâ demem iştiyâk gitsin Artsın o safâ firâk gitsin

Hôş-dillere gerçi ol belâdır Erbâb-ı belâya bir safâdır

1755 Mest ede beni o câm-ı bâkî Efzûn ede vasl o iştiyâkı

> Bîmâr-ı gamam recâ-yı derdem Çokdan beri âşnâ-yı derdem

Derdimle devâmı eyle hem-reng Nâlemle terânem et hem-âheng

Âgâhî Dâden-i Sühan Be Sûret-i Bülbül

Nâlân olarak gezerken ol mâh Bir bülbül-i mest gördi nâgâh

Kim Aşk'a hitâb edip o bülbül Zencîr-i gama verir teselsül

1760 Bu kal'ada bir hazîne vardır Boş sanma anı defîne vardır

> Ur âteşe çıksın âsmâna Ol mâlik o genc-i râygâna

Yakmazsan eger bu hoş sarâyı Bulmazsın ebed o dil-rübâyı

Hem duhter-i şâh-ı Çîn o ser-keş Eyler cigerin kebâb-ı âteş

Tâ yanmayıcak bu tâk-ı âlî Yokdur sana çıkmak ihtimâli 1765 Boş boşına eyleme tekâpû Efsûn ile bağlıdır bu kapu

> Ol duhterin anası perîdir Duhter sana cânla müşterîdir

Var aralarında çok keşâkeş Kim hâk ile ülfet etmez âteş

Âhir sana kasd eder perîler Hûn-ı dilini şarâb ederler

Ol bâğda kim içildi sahbâ Hep hûn-ı şehân idi serâpâ

1770 Ger bulmamış olsa tîğe ruhsat Habs etmege edemezdi cür'et

> Aşk anlayıcak bu mâcerâyı Bir âteşe urdı ol binâyı

Vaktâ ki dutuşdı ol kilîsâ Îsâ'ya buluşdı çok çelîpâ

Sûretleri çıkdı âsmâna Zeyn oldı bu heft âşiyâna

Verdi yine âh-ı serde pervâz Âteşden emîn idi o ser-bâz

1775 Hem kal'a hem ol zemîn yandı Hem duhter-i şâh-ı Çîn yandı

> Bir genc açıldı kim mutalsam Hep anda mümessel idi âlem

Ammâ yok içinde Hüsn-i yektâ Aşk eylemedi anı temâşâ

Zârîden-i Aşk Ez Râh-ı Bî Pâyân

Buldı o zemînde tîğ-ı âhı Hem tîr-i duâ-yı subh-gâhı

Düşdi yine râha ol perî-veş Kendin yakarak misâl-i âteş 1780 Ammâ ki ne râh her kadem çâh Her berg-i giyâhı mâr-ı cân-kâh

> Yâdına gelince kûy-i dildâr Eylerdi bu güft ü gûyı tekrâr

Ey mâh yeter yeter bu bî-dâd Feryâdıma yet ki yetdi feryâd

Bir çâresi yok belâya düşdüm Yek başıma Kerbelâ'ya düşdüm

Cân oldı piyâle-nûş-ı hasret Çeşm oldı güher-fürûş-ı hasret

1785 Âyîne-i dil harâb kaldı Mehtâb güm oldı tâb kaldı

> Bir bahrdeyim ki yok kenârı Bir cengdeyim ki yok hisârı

Oldı dile baht-ı şûm düşmen Vîrâneyi gör ki bûm-düşmen

Şeb kıldı nihân cemâl-i yâri Âyîneye düşdi sûg-vârî

Bozdı felek intizâm-ı ayşım Dâğ-ı dile döndi câm-ı ayşım

1790 Bir berk gelip harâb kıldı Kâh-ı tarabım urup yıkıldı

> Ben kaldım esîr-i derd-i hicrân Ağyâr ile yâr cân u cânân

> Hayretle dehân-ı gonca ebkem Düşdi gül-i şu'le üzre şebnem

Men bî-kes ü kâr kâr düşvâr Allah ganî rahîm ü settâr

Kıldı beni tâb-ı zülfi şeydâ Başım yazısıymış oldı peydâ

1795 Men haste-i hecr ü yâr bî-derd Müşkil bu ki gam-küsâr bî-derd

> Feryâda bile mesâğ yokdur Gerçi gam-ı intizâr çokdur

Âh etsem olur neheng-i âteş Âhir bana kasd eder o ser-kes

Çeşmim nem-i eşke gonca oldı Peymâne-i intizâr doldı

Men zevrak-ı derd içinde nâ-çâr Sâhilde figânda yâver ü yâr

1800 Yok kimseye zerre ihtiyâcım Makdûr-ı devâ degil ilâcım

> Şeh-râhıma çıkdı gûl-ı hasret Döndi geri gitdi akl ü hikmet

Kaldım yalınız başımda sevdâ Kimden kime edem ah u şekvâ

Tîh-i gama düşdüm âh feryâd Yok kimse ki zulmi edem isnâd

En yakını semt-i ihtidâda Kendim güm olaydım ol arada

1805 Gayb olmağa çâre bulsa bu dil Şeh-râh-ı necât olurdı hâsıl

> Bulsaydı yolın gelirdi tahkîk Var ise güm oldı Hızr-ı tevfîk

Düşmenler elinde hastelendim Peymâne idim şikestelendim

Gülzâr-ı cemâlim oldı târâc Oldum yine bir bahâre muhtâc

Sokdı beni zülf ü kâkülüm hep Kabrimde azâba geldi akreb

1810 Dem çekmede sanki medd-i âhım Yutdı beni ejder-i nigâhım

> Kaddim ki denirdi nahl-i yâkût Oldı bana şimdi nahl-i tâbût

> Çeşmim gibi lâ'lim oldı bî-mâr Zehr-i ecel oldı nûş-ı güftâr

Yakdı beni âteş-i izârım

Hûn oldı gözümde nevbahârım

Dikdim gözi râh-ı intizâre Perrî müjedir o çeşme-sâre

1815 Açılmadı gonca-i niyâzım Bulbül gibi uçdı hâb-ı nâzım

> Bir hayrete düşmüşüm ki gûyâ Âlem dolu hûn u zehr ü gavgâ

Bir berkın içindeyim ki medhûş Dûzah nazarımda tıfl-ı âgûş

Cânımda sürûra var adâvet Şâd ol desen eylerim kasâvet

Âteş nazarımda mihr-i rahşân Cennet gözüme diken mugaylân

1820 Olmuşdı ol âftâb-ı pür-tâb Bu kulzüm-i ızdırâba gark-âb

> Cûş-âver edip yem-i telâşın Deryâ deryâ dökerdi yaşın

Geh eşk gibi zemîne girdi Geh âh-veş âsmâna erdi

Der İsti'lâ-yı Kemâl-i Za'f Ber Vey

Ol mâh-ı cihân hilâle döndi Mihr-i şerefi zevâle döndi

Sahbâ-yı sabâhati azaldı Bir cür'a tih-i piyâle kaldı

1825 Bir rütbede za'fı oldı müzdâd Kim edemez oldı âh u feryâd

> Bir za'f ki za'fın intihâsı Belki ademin de mâ-verâsı

Deryâ-yı gama habâb olurdı Aldıkça nefes harâb olurdı

Bir sûret idi ki bî-heyûlâ

Bî-siklet-i harf özge ma'nâ

Kalmadı teninde pûşişe tâb Bâr olur idi harîr-i mehtâb

1830 Bâl ü per-i rengin eylese bâz Mülk-i ademe ederdi pervâz

> Bir şu'le idi çü kirm-i şeb-tâb Geh zâhir ü gâh olurdı nâ-yâb

Deryâ idi çeşmine nigâhı Nûr-ı nigeh idi sedd-i râhı

Müstağrak-ı za'f olup o mahzûn Rengini sanırdı kulzüm-i hûn

Zencîr idi ana târ-ı fikri Seyr etmez idi diyâr-ı fikri

1835 Gûyâ reg-i pertev-i nigâhı Dutmuşdı anı çü dâm-ı mâhî

> Za'f eyledi ol kadar füsürde Bir şu'le idi velîk mürde

Kımransa hevâya kalb olurdı Mırlansa sadâya kalb olurdı

Âzürde olup habâb-ı mülden Pejmürdelenirdi bûy-ı gülden

Tayy-edemez oldı mâh u sâli Kalmadı hayâta ihtimâli

1840 Ömri güzer eyledikçe her dem Eczâ-yı teni olurdı derhem

Eczâ deme cüz'-i lâ-tecezzâ Taksîmi hayâlden müberrâ

Her mû bedeninde sanki zencîr Olmuş velî sâyesinde tasvîr

Sîmâsı görünse etsen im'ân Cem' olmuş idi ademle imkân

Kim görse bunı ederdi ikrâr Kim ola bekâ fenâda der-kâr

1845 Sâye gibi düşdi Aşkar'inden Ayrıldı şirâre ahkerinden

Piyâde Şüden-i Aşk ve Nihâyet-i Perîşânî-i \hat{U}

Kaldı ser-i rehde bî-serencâm Ne tâb-ı sefer ne tâb-ı ârâm

Evzâ'-ı zemâneden ciger-hûn Peymâne-i âfiyet dîger-gûn

Ser-menzil-i kâma nâ-resîde Me'yûs-ı ebed belâ-resîde

Sad cây şikeste şîşe-i dil Etmişdi o senglâhı menzil

1850 Ol za'f ile haste-hâl ü medhûş Azrâil ile teni hem-âgûş

> Bîzâr hayât-ı câvidândan Dil-şâd memât-ı bî-amândan

Gönlinde ne cennet ü ne dûzah Ne zevka ferah ne hüzne âveh

Mevc urmada bîm ü ye's ü hayret Yok anda teessüfe liyâkat

Nâ-bûd cihândan ilticâsı Yok mevtden özge bir recâsı

1855 Mevt ise ümîd-i vasla mâni' Derdine degil şerâb-ı nâfi'

> Bilmez ne devâ tahayyül etsin Pây olmayıcak ne râha gitsin

Mahmûr idi şerbet-i kazâdan Dil-gîr idi yâr u âşnâdan

Gayret nazarında düşmen-i cân Gelmez diline ümîd-i cânân

Nevmîd idi vasl-ı dil-rübâdan Ummazdı necât-ı dil belâdan 1860 Tevkîr için ol gam-ı nihâna Eylerdi bu beyt ile terâne

> Hecrinle ciger kebâb ey dost Gel gel ki gönül harâb ey dost

Sıfat-ı Subh-ı Mübârek-pey

Bir subh-dem etdi bâğı ihyâ Âsâr-ı sabâh-ı rûh-bahşâ

Olmuşdı şafak dıraht-ı Meryem Doğmuşdı meger Mesîh-i hoş-dem

Mihr eyledi öyle bir tecellî Zann-oldı ki Tûr'a çıkdı Mûsî

1865 Hurşîd sabâhı kıldı pür-nûr Cây oldı Alî'ye kûh-ı Billûr

> Açıldı kilîd-i çâh u zindân Mısr'a yine Yûsuf oldı sultân

Bedr etdi esâs-ı subhı te'sîs Manzûr-ı Cem oldı taht-ı Belkîs

Çekdi yine Zülfekâr'ı Hayder Şemşîr ile feth olundı Hayber

Mihre mahal oldı subh-ı hurrem Tekrâr behişte girdi Âdem

1870 Açdı reh-i gaybı Hızr-ı ma'nâ Mir'ât-ı Sikender oldı dünyâ

> İsmâîl-i mihri dutdı mükrem Öpdi ayağını çâh-ı Zemzem

Hurşîde yer oldı subh-ı dil-keş İbrâhîm'e gülşen oldı âteş

Mihr eyledi subhı *ihn-i menfûş* Eczâ-yı zemâne oldı gül-pûş

Seyr eyledi cûy-ı şîri Şîrîn

Ferhâd'ına sundı câm-ı lâ'lîn

1875 Yüz dutdı velî azîz-i matlûb Ammâ ki ağardı çeşm-i Ya'kûb

Resîden-i Sühan Be Sûret-i Pîr-i Tabîb

Mânend-i sabâh-ı feyz bir pîr Geldi ser-i râhı kıldı tenvîr

Ammâ ki ne pîr subh-ı sâdık Her sohbeti hikmete muvâfık

Medd-i nazar eldeki asâsı Pür-nûr melek gibi likâsı

Cûbâr-ı hayât âb-ı rûyı Mehtâb gibi sefîd mûyı

1880 Ebrûsı hilâl-i îd-i ümmîd Her cünbişi bir nüvîd-i ümmîd

> Sohbetleri hikmet-i kaderden Peygâm verir Ebü'l-beşer'den

San rîş-i sefîdi mağz-ı Mansûr Hak her sözi hemçü nefha-i Sûr

Mir'ât-ı kemâline Aristû Hayretle hemîşe ser-be-zânû

İskender'e re'yi meş'al-i râh Dünbâle-revânı mihr ile mâh

1885 Gerdûn gibi câme-pûş-ı hadrâ Dârende-i zeyli Hızr-ı ma'nâ

> Rûhu'l-Kudüs'ün emîn-i râzı Gencîne-i vahy kâr-sâzı

Pür-şa'şaa rûyı mûyı esfîd Mehtâbda hemçü kurs-ı hurşîd

Vird-i lebi Seb'a-i Mesânî Şâgird-i kemâli akl-ı sânî

Gencûr-1 mücerredât-1 esmâ

Cem'-âver-i müfredât-ı ma'nâ

1890 Sübbûh-künân o pertev-i cân İndi o yere çü nûr-ı Kur'ân

> Aşk'a verip istimâlet-i tâm Gönlin ele aldı kıldı ikrâm

> Dedi ki tabîb-i rûzgârım Ol fenn-ile şöhre-i diyârım

Geldim sana eyleyim müdâvâ Olursan eger benimle hem-pâ

Durma gidelim hisâr-ı Kalb'e Arz et bunı şehriyâr-ı kalb'e

1895 Zîrâ sen o kîmyâya muhtâc Derdin senin ol devâya muhtâc

> Anın adı Hüsn-i bî-nişândır Bu nâm ile söhre-i cihândır

Ol mâlikidir hisâr-ı Kalb'in Şâhenşehidir diyâr-ı kalb'in

Za'fın senin eylemişler ihbâr Gönderdi beni o şâh-ı bîdâr

Be Hod Âmeden-i Aşk ve Güm Şüden-i Gayret

Çün oldı bu müjdeden haberdâr Öldi vü dirildi yine tekrâr

1900 Bir müjde bu kim cemî'-i âmâl Bir hâl ki mâ-verâ-yı ahvâl

> Hem bahş-ı hayât-ı câvidânî Hem müjde-i cümle-i emânî

Hep gitdi o za'f geldi kuvvet Bîmâr-ı gama göründi sıhhat

Bir sözle açıldı gonca-i dil Bir şem'-ile rûşen oldı mahfil

Bir yana nüvîd-i vasl-ı kîmyâ Bir yana ümîd-i Hüsn-i yektâ 1905 Aşk olmuş idi bu hâle hayrân Gayret nazarından oldı pinhân

Hitâb-ı Sâkî

Ey sâkî-i Cebreîl-meşreb Peymâne-i vahyim et lebâleb

Bir nefha-i cânla eyle pür-cûş Îsî-i zamîrim etme hâmûş

Sen ol bize sâkiyâ Sirâfîl Kıl mevtimizi hayâta tebdîl

Bu bezme kılıp sürâhîyi sûr Eyle cesed-i kelâmı mahşûr

1910 Sâkî sâkî revâ degildir Merdân-ı Hudâ cüdâ degildir

> Sâkî sana Rûh-ı kuds derler Güftârına râh-ı üns derler

Ger Aşk ile güft ü gû edersin Dahi kimi cüst ü cû edersin

Erbâb-ı sühan egerçi çokdur Bu neş'ede benden özge yokdur

Ben durdum u âlem oldı hâmûş Tûr etdi Kelîm'ini ferâmûş

1915 Dâvûd-ı dilim Zebûr-hân et Mürgân-ı sürûşı bî-zebân et

> Ammâ kerem et güzel haber ver Bu def'a da neş'e-i dîger ver

Her neş'ede gerçi mest birdir Çok ise *belâ elest* birdir

Ammâ ki çü şem'-i aşk sönmez Bensiz bu medâr-ı derd dönmez

Bir câm-ı ferahla eyle hüşyâr Tâ mest olayım dü bâre tekrâr

1920 Vâdî-i ferahda bir seyirdir İnşâallah ki fal hayırdır

Der Zikr-i Resîden-i Aşk Be Hisâr-ı Kalb ve Garâib-i Ân

Ol pîr edip ol cüvânı hem-râh Bin şevk ile kıldı azm-i dergâh

Ol şevk ki hiç beyâna sığmaz Bir handesi âsmâna sığmaz

Çün oldı hisâr-ı Kalb peydâ Aşk anda ne gördi kıl temâşâ

Bir kal'a ki sengi sürh yâkût Nâsûtda bir sarây-ı lâhût

1925 Her hıştı mücevher ü murassa' Hurşîd ile rû-be-rû muşa'şa'

Envâr-ı nukûş-ı gayb memlû Esrâr-ı rumûz burc ü bârû

Her burcda reng reng envâr Bârûları cümle genc-i esrâr

Gözler kamaşır nümâyişinden Sözler tükenir sitâyişinden

Bir cânibi bahr-ı nûr-peyker Bir cânibi deşt-i mevc-i ahder

1930 Beş bâbı o bahr-i pâke nâzır Dîger beşi hem bu hâke nâzır

> Beş bâb velîk arş-fersâ Her kullesi kûh-ı Kâf'a hem-tâ

Her bâbda bir sürûş-ı ekrem Çün Rûh-ı muazzez ü mükerrem

Bâl ü peri sebz-i nûr-ı hadrâ Gûyâ ki o kûh-ı Kâf'a ankâ

Yanında niçe hadem haşem var Her şâh ile bin perî sanem-vâr 1935 Beş bâb ki bahre nâzır idi Evsâfı verâ-yı hâtır idi

> Aşk oldı bu şehri gördi medhûş Mahv oldı ne nâtık u ne hâmûş

Ol pîr dedi ki bilmedin mi Bu hayretden kesilmedin mi

Tâ key sana bu belâ-yı hayret Yaklaşdı hemîn safâ-yı hayret

Açıldı biraz o mâh-peyker Ekdâr-ı hüsûfı geçdi yek-ser

1940 Velhâsıl o pîr-i pâk-i kâmil Ol mâh ile şehre oldı vâsıl

> Bir şehr bu kim verâ-yı imkân Seng-i rehi gevher-i sühan-dân

Cû gibi ederdi cadde sür'at Gam atmağa anda yokdı hâcet

Aşk oldı bu hâle mest-i serşâr Etrâfını aldı cünd-i envâr

Âmeden-i Mübeşşirân-ı Envâr

Evvel bir alay sefîd-hil'at Reşk-âver-i feyz-i subh-ı vuslat

1945 Hemçün rem-i âhuvân-ı esfîd Hep câme-i subh içinde hurşîd

> Zerrîn-kabâ hezâr asker Zer-pûş zer-efser ü zer-â-zer

Yekpâre kanadlı hûr-sîmâ Başdan başa her birisi kîmyâ

Bir cânibi lâciverd-pûşân Deryâ gibi oldılar hurûşân

Zer-pûşlar oldı anda nâ-yâb Gerdûnda misâl-i necm-i bî-tâb 1950 Dîger niçe sürh-pûş-ı pür-cûş Her biri behişt ile hem-âgûş

> Her birisi mihr ü mâha hem-ser Cennet velî şu'le-zâra benzer

Bir cânibi bir gürûh-ı memdûh Yekpâre zümürrüd idi zî-rûh

Bir cünd-i şerîf-i sebz-deryâ Emvâcı hayât-ı cân-bahşâ

Bir cânibi hep siyâh-pûşân Leyl içre çü encüm-i dırahşân

1955 Ta'rîfe degil birisi muhtâc Şâm idi velîk şâm-ı mi'râc

> Velhâsıl o ceyş-i mevc-der-mec Sad reng ile geldi fevc-der-fevc

Elvân ile her gürûh-ı yektâ Envâr-ı mücessem idi gûyâ

Pertevleri kıldı reng-der-reng Envâr-ı hayâli ceng-ber-ceng

Ammâ ki zemîn-i kal'a-i pâk Âyîne idi çü akl-ı derrâk

1960 Her aksden ol zemîn-i pür-nûr Gösterdi hezâr rûh-ı mahşûr

> Var anda niçe sarây-ı âlî Zâtü's-suver'in bütün misâli

Ammâ ki bunun nukûşı zî-rûh Bî-cân degildi hemçü yebrûh

Her revzen-i hânesinde hâzır Bin duhter-i şâh-ı Çîn nâzır

Resîden-i Aşk u Sühan Be Sarây-ı Hüsn

Vakta gelip ol gürûh-ı envâr Ta'zîm ile Aşk'a oldılar yâr 1965 Kıldılar o şâha cümle hizmet Âdâb ile dest-bûs-ı bey'at

> Bir taht-ı münevver oldı peydâ Ol pîr ileAşk oturdı hem-tâ

Aldılar o şâhı eyleyip azm Seyrâna o şehri kıldılar cezm

Her gûşede niçe bâğ u bustân Her birisi reşk-i bâğ-ı Rıdvân

Gencîneler anda âşkâre Memzûc idi cevhere sitâre

1970 Bir niçe umûr-ı gayr-i ma'kûl Her nazrada Aşk'â oldı mahsûl

> Yâd eyleyip ol hevâ-yı Hüsn'i Gözlerdi hemîn sarây-ı Hüsn'i

Nâgâh göründi bârgâhı Bir kasr-ı garîb-i pâdşâhî

Yekpâre zümürrüd ü zeberced Her revzeni cennet-i muhalled

Mestûr-ı hezâr-perde-i gayb Âsûde-nişîn-i rayb u lâ-rayb

1975 Tahtından inip yanında ol pîr Ol kasra erişdi tâ be tedbîr

> Aşk etdi bir iki sâat ârâm Tâ kim gele pîr vere peygâm

Zuhûr-ı Esrâr-ı Hafiyye

Bir gûlgûle kopdı kasr içinde Kim görmemiş idi asr içinde

Âvâz-ı sürûd-ı nây u tanbûr Bir velvele hemçü nefha-i Sûr

Âvâze-i tabl-ı şâdmânî Âsâr-ı neşât-ı câvidânî 1980 Bir perde açıldı nâ-be-hengâm Aşk oldı tehayyür ile sersâm

> Bir hâl-i garîb oldı peydâ Kim eylemez idi hiç hûlyâ

Kim Gayret ü Hayret ile İsmet Geldiler ana berây-ı hizmet

Hem dahi Sühan o pîr-i enver Mollâ-yı Cünûn da besberâber

Tebşîr kılıp Sühan mukaddem Dedi ki ayâ hıdîv-i ekrem

1985 Bu hâli bilir misin hele sen Sen kandasın ü dahi kimim ben

> Bu şehr ne şehr-i dil-sitândır Bu bâğ ne bâğ u bûstândır

Seyr ü seferin ne râhdandır Zûr u hünerin ne şâhdandır

Yâdında mıdır Benî Mahabbet Nüzhet-geh-i Ma'nî cây-ı vuslat

Bu işte o bâğ-ı bî-bedeldir Bu hâne henûz ol mahaldir

1990 Kim bunda ne gûl var ne evhâm Ne dîv-i siyâh u zişt peygâm

> Ne âteş-i sihr ü ne şitâ var Ne bîm-i helâk ü ne belâ var

Bi'lcümle neşât-ı câvidânî Envâ'-ı surûr u şâdmânî

Fehm eyle ki bu garîb sırdır Erbâb-ı ukûle müstetirdir

Ben ol Sühan'ım ki edip ikdâm Çehden sana râhı etdim i'lâm

1995 Câdûyı helâk eden ben idim Bu yolları pâk eden ben idim

> O bülbül o tûtî-i sühan-gû Hem ben idim ol tezerv-i dil-cû

O pîr-i tabîb-i pâk-tînet Bendim sana eyledim delâlet

Geldim yine da'vet-i visâle Vâkıf olagör meâl-i hâle

Bulmağa zuhûr bu mebâhis Bir kec-nazar olmuş idi bâis

2000 Kim Aşk Hüs(ü)n'dür ayn-ı Hüsn Aşk Sen râh-ı galatda eyledin meşk

> Birlikde bu kîl ü kâl yokdur Ol farzda hiç muhâl yokdur

Teslîm Kerden-i Sühan Aşk Râ Be Dest-i Hayret Ve Âvurden-i Û Be Harîm-i Visâl

Var imdi gör ol melek-likâyı Seyr eyle o Hüsn-i bî-bahâyı

Tâ cümle nihân ıyân ola hep Evvelki ıyân nihân ola hep

Hem-râhların bu râha erdi Aşk ancak o pâdşâha erdi

2005 Mollâ-yı Cünûn u Gayret İsmet Hem kaldı geri Benî Mahabbet

> Hem üns-i Sühan nihâyetindir Bundan ilerisi Hayret'indir

Filvâki' alıp o şâhı Hayret 2007 Açıldı sürâdıkât-ı vuslat

Buldı bu mahalde kıssa pâyân Bundan ötesi degil nümâyân

Sad şükr ola Hayy-i lâ-yemût'a Kim erdi söz âlem-i sükûta

Fahriyye-i Şâirâne

2010 Tarz-ı selefe tekaddüm etdim Birbaşka lügat tekellüm etdim

Ben olmadım ol gürûha pey-rev Oymuş belî Gencevî'ye Hüsrev

Billâh bu özge mâcerâdır Sen bakma ki defter-i belâdır

Zann-etme ki şöyle böyle bir söz Gel sen dahi söyle böyle bir söz

Erbâb-ı sühan temâm ma'lûm İşte kalem işte kişver-i Rûm

2015 Gördün mi bu vâdî-i kemîni Dîvan yolı sanma bu zemîni

> Engüşt-i hatâ uzatma öyle Beş beytine bir nazîre söyle

Az vaktde söyledimse anı Nâ-puhteligin degil nişânı

Gördük niçe şâhlar gedâlar Bir ânda yapar anı babalar

Gencînede resm-i nev gözetdim Ben açdım o genci ben tüketdim

2020 Esrârını *Mesnevî*'den aldım Çaldım velî mîrî malı çaldım

Fehm etmege sen de himmet eyle Ol gevheri bul da sirkat eyle

Çok görme bu hikmet-i beyânım Tevfîka havâle eyle cânım

İn dem ki zi şâirî eser nîst Sultân-ı sühan menem dîger nîst

Hakîkat-i Hâl ve Hâtime-i Kitâh

Ey hâme eser senin degildir Ey şeb bu seher senin degildir 2025 Envâr-ı füyûz-ı Mürşid-i Rûm Âfâka fürûğum etdi ma'lûm

> Kıldı beni tıfl-ı mısra-âsâ Doğdum doğalı sühanla ber-pâ

> Ben tıfl idim eylemezdim ülfet Bulmuşdı sözüm temâm şöhret

Bî-minnet ü üstâd-ı ta'lîm Ser-nâme-i tab'ım etdi tanzîm

Allah Allah zihî inâyet Nâ-bâliğa hikmet-i belâgat

2030 Feyz erdi Cenâb-ı Mevlevî'den Aldım niçe ders *Mesnevî*'den

> Gûyâ ki o bahr-i bî-kerâne Olmuş hum-ı rengden nişâne

Dil hemçü şegâl o bahre düşdi Hem-cinslerim başıma üşdi

Tâvûs-ı behişte eyledim nâz Ammâ ki yok iktidâr-ı pervâz

Boşboşına ney-veş etdim efgân Ben söyledim oldı şem' giryân

2035 Olmuşdı bu sîne dîk-i hikmet Ni'met leb-i gayre oldı kısmet

Meh gibi açıldım u dolundum Vakt âhir olunca boş bulundum

Sînemde ne aşk var ne tâbiş Ebnâ-yı zamâna bir nümâyiş

Müjdemden alındı âşnâlar Gitdi hepisi diyip duâlar

Ben kaldım o söz lebimde kaldı Keştî-i murâd lenger aldı

2040Cânımda ne sûziş-i taleb var Gönlümde ne neş'e-i tarab var

Bu resme kalır gidersem eyvâh

Tevfîkına mazhar ede Allah

Târîh-i Hâtime

Gâlib bu cerîde-i cefânın Târîhi olur *hitâmuhu'l-misk*